


TEEMÈSHÀ BUKÊNKÊ

 Èyo. Eci ki . . . [Mwanèètù wa balùme kampàndà ùdi wàmba ne: “*Eci* ke cikòlokolo cyèbè.”—Muf.] Eci ke cyà citàmbe bukolè anyi? Twasàkidila, mukalenge. [“*Eci* ke cikòlokolo cidì cijikùke.”] Èyowà’s, mukalenge. Èyo. Ndi mmòna ne bàvwa bàpeta mèyi àtwa àlukila ndambù paanyimà pààpa, ne pa nàнку . . . Mwoyi wènù awu, mu dindà emu, balundà bàànyì. Nudikù mwà kungumvwa bimpè lwà paanyimà pààpa anyi? [Disangisha didi dyàmba ne: “Èyo.”] Aci nciçimànyike. Twasàkidilaayi.

2 Ncyà bushùwà ne ndi muntu wa dyèsè, mu dindà emu, bwà kulwa pa cibùmbà cyà ku cyambilu eci, paanyimà pàà majaadiki malenga bu nunku mamanè kufidiibwa; bwà kuteeta bwà—kusàkidilakù ànu ndambù mukesè ku àkaavwàbo bàmbè awu, bwà kutùwàdila mabènesha mutùkaadi bàsànkidile mu dindà emu. Mpindyewu, mvwa mumòne ne bàmwè bàà kùdìbo bàvwa menemene . . .

3 [Ndongolwelu wa byonà ùdi wàluja mèyi. Mwanèètù kampànda ùdi wàmba ne: “Ndi ngèela meeji ne tudi ne cyà kucifèeka, eci, munkaci amu, Mwanèètù Branham.”—Muf.] Èyo, mukalenge. Mbimpè nàнку anyi?

4 Ne bàmwè bàà ku bantu abu kaaba aka, mùdìbo baakùle, ne bààbùngi bàà kùdìbo . . . Èè, bantu bònsò kaaba aka bàvwa ne bujaadiki bwà bubàlakana, bwà bwèla nsèsà menemene. Mùshindù mwinè wùndi ncyanyisha’s wè, bujaadiki bulenga bwà Mukalenge abu’s!

Mpindyewu tukàadi tuseemena pabwìpi ne Dìyi.

5 Nènku mèmè, lumingu elu, ndi mupangadike munda mwà mwoyi wànyì bwà kubènga kulama bantu mèbà àbìdì anyì àsàtù aa, kacya basòmbe, munkaci mwà kuntèeleja. Ndi nnwàmabila bwà cinyi ndi—ndi ngènza nàнку, balundà bàànyì. Ncyèna mulonge kàlaasà to, ne ndi mwà kwakula ànu ku disonsodiibwa. Mpindyewu, muntu udi mulonge kàlaasà, pàdiye pèndè musonsodiibwe; kàdi yèyè ùdi mwà kuumvwija cidìye wàmba aci, ku dilonga dyèndè dyà kàlaasà, kupàtula myàkù yàfikishà bantu ku dimanyabò cidìye wàmba. Nciyi ne kàlaasà kalonga to, bikèngela ngàngatè bimfwànyì byà mu bufuki bwà kwamba patòoke ku disonsodiibwa dindì naadi. Nènku aci cidì cyènza ne bwalu bwikalè bukolè, mingà misangu, bwà bantu kuumvwabò cyà bushùwà. Tudi tusangana ne mvwa mutàcishiibwe bukolè bwà cyòci aci too ne pàngàkasangana mu Bible ne Nzambi wàkenza mùshindù ùmwèùmwe awu, mishindù yimwèyimwè ayi.

6 Tudi tumòna ne, bu Yone Mubàtiji, mpatùdi katùyi ne mulubu wa dilonga dyèndè dyà tulaasà to, ne pashiishe, pàdiye—pààkapàtùkàye mu cipèèlà, wàkabanga kwakula ne—ne. . . disangisha dyèndè, èkèleeziyà wa ditùkù adi. Nènku tudi tumòna mwàkacyàmbàye patòòke. Yèyè wàkamba ne: “Nwènù lukòngò lwà nyòka.” Nwamònu’s, ki cìvwaye mwibidilàngàne naaci aci’s, bufùki ne cipèèlà; mu ngaakwilù mikwàbò, cintu kampànda cìdi cìdìfìnda mu musokoko ne ciikàle ne budimbu pambidi, ne ciseeswishangana. Mpindyewu, muntu kampànda mukwàbò ùvwa mufwànyine kwikala mukùmbàne bwà kutwàla mwàkù kampànda ùvwà mufwànyine kwikala mwàmbe ne “bashimyanganyi” anyi mwàkù kampànda ùvwaye mufwànyine kwikala mwangàte bwà kucyùmvwija awu. Kàdi Yone ùvwa mwangàte mwàkù wà “nyòka.” Ngèela meeji ne bantu bònso bàvwa bùmvwè cìvwaye wàmba aci.

7 Ki dībà adi kwambayè ne: “Kanùbangi kudyàmbidila mundamunda mwènù amu to, ne: ‘tudi beena *cikampànda* ne tudi bàà mu *cikansanga*,’ bwalu ndi nzwàmabila ne, Nzambì ùdi ne bukolè bwà ku mabwe aa mwab’ewu,” nwamònu’s, nwamònu’s, kaciyi muntu kampànda munène to. “Nzambì udi ne bukolè bwà ku mabwe aa.” Yèyè wàkacyùmvwijila mu bufùki.

8 Nènku, kàbìdi: “Cisuuyi ncitèèkìlwe ku muji wà mucì.” Mwanèètù kampànda wa balùme mwimpè mulongè tulaasà ewu, mwikàle ne disonsodiibwa òmwèdimwè adi, ùvwa mufwànyine kwikala mwàmbe ne: “Yèyè neàbutulè.” Yèyè ne: “Cisuuyi cìdi ku muji wà mucì.” Aci cìdi cìwùbùtula, nànsha bishi, nwamònu’s, pa nànkù yèyè—yèyè ùvwa mumanyè ne cìvwakù. Yèyè ùvwa ànu ne byàkwidi abi, bwalu misangu mikwàbò kàvwa mulonge kàlaasà nànsha kakesè to.

Twinyikàayi mitù yètù bwà katanci kakesè cyaànà.

9 Ndi ne malomba mwaba ewu bwà disambila. Bwalu, ki mudimu wànyi wà bwambi ngwòwò awu, kusambidila babèedi. Ndi ne ndambù wa malòmba mwaba ewu, malòmba kampànda à pabwàwù. Ne ndi mumanyè ne kùdi bààbùngì kaaba aka. Nènku ní kùdikù bàmwè, mu dindà emu, bàdi baswè bwà bàbàvùlùkè’s? Èè, bu nwènù ànu mwà kwela byanza byènù muulu kùdi Nzambì, kwamba ne: “Ndi. . .” Mpindyewu shààlaayi ànu balamè malòmba ènù patùdi tusambila apa.

10 Taatù wetù wa mu Dyulu, nyèwù tuseemena mpindyewu pabwìpi ne Cijila Cyèbè, mu Dìná dyà Mwànà Webè wa Cijila, Mukalenge Yesù, bwà kulòmbakù dilòmba edi, dyà yònsò wa ku bantu bàdi bafunde malòmba àbò, àndì naawù kaaba aka mu cianza cyànyi emu. Nangàngà mwànà wa bakàji mutekète, mulenga kumòna wa mwanèètù wa balùme ewu uvwa musùnsùdiibwe mu njìwù ayi awu. Ndi nsambidila mwànà awu, Mukalenge. Nènku ndi nsambidila malòmba makwàbò ònsò. Ne àdi masokòme kutùdi mpindyewu, àdi mamanyika ànu kùdi aba

bàdi bèle cyanza cyàbò muulu; kàdi Wèwè udi Nzambì wa kàyì mikàlù, ne Wèwè udi mumanyè kabingilà ne kabingilà kònsò ne malòmba ètù ònsò. Tudi tulòmba bwà Wèwè kwandamuna. Bwalu Wèwè ngudi mucilayè, tudi tuciitabuuja.

¹¹ Nènku tudi tulòmba mpindyewu bwà Wèwè kwangatakù ndambù wa mèyi atwàbalà aa, ne àsonsòlèku kutùdì, Mukalenge, patùdì baKwindile apa. Nyumà Mwímpè àseemenè pabwìpi ne muntu ne muntu, ne àtùbuulwilè dyumvwija dyà Díyi. Bwalu tudi tulòmba nùku mu Dìnà dyà Yesù. Amen.

¹² [Mwanèètù wa balùme kampànda ùdi wàmba ne: “Mwanèètù Branham, tudikù mwà kuteeta bwà kumòna ní ncifwànyine kwanza mudimu bímpè anyi?”—Muf.] Èyowà’s, mukalenge, mwanèètù, enza wèwè ànu mùdì muswè amu. Bìdì ànu bímpè. Pàndì munkaci mwà kubuulula mpindyewu apa, ndi ne . . .

¹³ Kale wàwa mvwa mwà kuvùluka Mifùndu yànyì ne bikwàbò, ncìyi ne—ne kantu kafùnda to, kàdi kacya ànu ngààpita pa bidìmu makùmi àbìdì ne bitaanu, abi kabyèna byènda bímpè menemene to. Bikèngela ncìvùlukè pa kucifùnda. Mpindyewu tuyààya . . .

¹⁴ Mbímpè nànkù anyi? Nudikù mwà kuumvwa bímpè nànkù anyi? To. Lwà mundekeelu mwàmwa, bàdi bàkùpa mitù yàbò. Pàmwàpa . . . [Mwanèètù wa balùme kampànda ùdi wàmba ne: “Bikèngela wèwè kwimana ànu mumpàlà mwàcì amu.”—Muf.] Bikèngela wìmanè . . . [“Ànu mumpàla menemene.”] Mbímpè. Kàdi mmunyi mwikala eci mùshindù ewu, nudi mwà kuumvwa aci anyi? Bishi bwà aci, aci ncímpè anyi? Bímpè bitàmbe. Abi’s mbímpè.

¹⁵ Mpindyewu ndi njinga kukòka ntèmà yènù ku—ku Yeshàayi 42.1-7, kàbìdì ne ku Maatàayi 4.15-16.

Mònaayi musadidi wanyì, ùndì ntwà nyama ku mikòlò ewu; musungula wanyì, mwena munda mùdì musùukà wànyì ùsànkila; ndi mutèèke nyumà wanyì pambidi pèndè: yèyè neàtwalè cilumbulwidi kùdì bàà Bisàmbà byà bendè.

Yèyè kààkwela mbilà, nànsha kubàndisha dìyi, ànyì kwenza ne dìyi dyèndè dyumvwikè mu mùsèsù to.

Cituuta cicìbùke yèyè kààkucikòsa to, . . . mukùsù ùdì ùfwìma yèyè kààkuwùjìma to: yèyè neàtwalè cilumbulwidi pa kaaba kàà bulelèlà.

Yèyè kààkupangila anyi kutekeshiibwa mu mabòko to, too ne pààjaadikàye cilumbulwidi pa buloba: ne bisanga nebìndilè mukenji wèndè.

Emu mmùdì . . . MUKALENGE wàmba, yèyè wakafùka maulu awu, ne wàkaòlola; ewu wakaalabaja buloba, ne byònsò bìdì bipàtùkamù abi; ewu udi ùfila dyàmpà bwà bantu bàdi basòmbapù, ne nyumà kùdì bàdi bèndelamù.

Mémè MUKALENGE ngudi mukubùkile mu bwakànè, ne wíkala mwà kukuwàta cyanza cyèbè, . . . nènkulamè, ne nènkupèèsha bu cipungidi cyà bantu, bu bukènkè bwà bàà Bisàmbà byà bendè;

Bwà kutàbeeja . . . mèsù à bampofò, kupàtula . . . beena bùlokò mu màlokò, ne aba bàdi basòmbe mu mìdimà kubàpàtula mu . . . nzùbu wa bùlokò.

¹⁶ Nènku mpindyewu mu Maatàayi Munsantu 4, kubangila ku mvensà wa 12, tudi tubala nùku.

Mpindyewu pààkumvwà Yesù ne Yone wàkeediibwa mu bùlokò, wàkaya mu Ngalèlà;

. . . kuumuka mu Nazalètà, yéyè kulwa ne wàkasòmbela mu Kaapènumà, udi ku mwelelu wà mbù, ku myelelu yà Zabùlònà ne Nefatàli:

Bwà kuujiibwakù cyàkambàbo kùdi Yeshàayi mupròfeta awu, wàmba ne:

Buloba bwà Zaabùlònà, ne buloba bwà Nefatàli, ku njila wa ku mbù, dyàmwàmwà dyà Yadènè, mu Ngalèlà wa bàà Bisàmbà byà bendè;

Bantu bàvwà basòmbe mu mìdimà bàakamòna bukènkè bunène; ne kùdi aba bàvwà basòmbèle mu bitùpà byà malaba byà mindidimbì yà lufù bukènkè mbubàteemène.

Kubangila ànu pa dībà adi Yesù wàkatwàdija kuyiisha, . . . wàmba ne: Nyingàlàlaayi, bwalu bukalenge bwà mu dyulu bùkaadi pabwìpi.

¹⁷ Mukalenge àbeneshèku Dìyi Dyèndè! Mpindyewu cyena-bwalu cyànyi mu dindà emu cidì ne: *Teemèshà Bukènkè*. Nènku ne lùkàsà lwònsò, bwà nwamòna mwà kupàtuka bwà cipungidi cidì cìlonlà mpindyewu eci, cìikalà mu tusunsa tutwè ku makumi ànaayi ne tùtaanu emu aci.

¹⁸ Nudi bamanyè's, Mukalenge Mc Anally, ngèèla meeji ne yéyè ùdipù. Mvwa mumòne cisemuna cyèndè pambèlu pààpa's. Kùkaadi cikondo kampànda, tuvwa basòmbe, mu lùmwe lwà ku ngendu yànyi yà kumpàla yà ku Arizona eyi, bwà kuya kalemba nyama. Tuvwa basòmbe mwab'ewu pabwìpi ne Mukùnà wà Mājimbu. Mvwa mucyùmvwè kùkaavwa matùkù àbùngì, ne mùmvwè myanu yàbùngì yìvwà myediibwe pa bwalu bwà Mājimbù awu's. Ndi mvùluka ne mvwa ncikèba, musangu wà kumpàlà; cìvwa nkumpàlà kwà kucyàbo, ne mundidimbì wà mukishi mulembèlèle ku luseke lwànyi lwà ku esètè, ùvwà mumanyike bu Mājimbu. Mvwa muumvwe bàakula bwà ba-Indiens, mùvwàbo kabàyi baswè kuseemena pabwìpi naaci to, mùvwàbo bàciina's, mùvwà ba-Espangoles babàkèngèshe mu matùkù à mbangilu pàvwàbo bènda bàkèba ngòlò apu. Bàvwa bàmba ne mikishi yìvwa misòmbèlemù. Cyònsò aci kàdi

kusalulaci dijinga kumanya dyanyi. Kadi mwawa ànu ne mwèndù wà toolòshì, bwà kumòna Mājìmbu awu, dyàmbedi.

¹⁹ Ki pashìishe mèmè kutàngila too ne, paanyimà pàà katanci, bunème bwà díbà kubangabò kubwela mu mídímà. Nènku pààkènzàbu nànu, cyàkatàpulula mídímà ne bukènkè, ne kusaka mídímà paanyimà. Ndekeelu wa byònsò, bwàkabànda mu butùmbùke bwàbù, ku lusongo lwà mukùnà awu, ne bwàkaleeja Mājìmbu awu cìvwàwu. Bwàkateema ne kuleeja cìvwàbu. Nènku dizakala dyònsò ne bwòwà bímvwà naabi bwà Mājìmbu awu abu, pàvwà díbà munkaci mwà kukenkeshapù mu bukolè bwàdi apu, byònsò byàkaya mwamwamwa.

²⁰ Díbà didi mfùmù wa makènkè wònsò pa buloba apa, mu makènkè à mu bufùki. Nànsha bàmba ne tudi ne bukènkè bwenza kùdi bantu bwà bishi, ne búngì bwà nsèsà yà nzembu minène yitùdi mwà kupàtula; pàdi ànu díbà adi dibànda, bwònsò bwàwù adi àbwita bwì.

²¹ Ncintu cìmwècìmwè aci ne Díyì dyà Nzambi. Pàdi Díyì dyà Nzambi dibànda, miitabuuja ónsò à mājìmbù, dikolesha dyà maalù dyà cyena màngumba ne bikwàbò, bìdi bitangalaka, nènku cìdi cìcileeja ànu menemene cìdici. Nzambi, ku cibangidilu, wàkamba ne: “Bukènkè bwikalèku.” Bukènkè bùdi bùlwila ànu, Bukènkè bulelèlè, Bukènkè bwà mfùmù, bùdi bùlwila ku Díyì dyà Nzambi. Nzambi wàkatàpulula bukènkè ne mídímà, ku cibangidilu. Nènku Díyì dyà Nzambi, dimwènèshìibwe, dùtu misangu yònsò ànu ditapulula Bukènkè ne mídímà.

²² Bantu bàdi mwà kujuuka ne *cikampànda*, *cikansanga*, anyì *cikankènga*; tusùmbù tùdi mwà kujuuka, Communisme, Fascisme, ne tusùmbù tukwàbò twònsò tùdi mwà kujuuka; miitabuuja à mājìmbu, tusùmbù twà ntèdeleelu, cyònsò cìdici cìfwànyine kwikala aci, ncìfwànyine kujuuka. Kàdi pàdi Bukènkè bwà mfùmù bwà Bible abu bùjuuka, miitabuuja ónsò à mājìmbu ne bikwàbò. . . Kàdi, nudi numòna’s, tudi bamanyè ne bùdikù, kàdi ànu pàdiBu bùshindikiibwa, bùjaadika Bukènkè Bwèndè; díbà adi katwèna ne bukenji bwà kukòkangana naaBù to, bwalu Bùdi bùjìma bukènkè bukwàbò bwònsò. Yesù wàkamba ne: “Díyì dyà muntu kanà yònsò ewu diikalè mashimi, kàdi Dyanyi Mèmè diikalè Bulelèlè.” Díyì Dyèndè didi ku mutù kwà mèyì ónsò à bantu, kumutù kwà byònsò, cintu kanà cyònsò. Díyì Dyèndè didi Bukènkè.

²³ Ne tudi bamanyè ne ku cibangidilu kùvwa ne cyàkwikala maciima ne kufwè ne mifitù, pàvwà buloba bwènda bunyùnguluka apu, nènku mpàvwà Nzambi mumanyè ne Yèyè ùvwa dijinga ne bukènkè. Mpindyewu, dimiinu Dyèndè dikaavwa mu buloba, bwalu Yèyè ùkaavwa mumanè kudikunamù. Mpindyewu Yèyè ùvwa ùkèngela bukènkè bwà

kupàtula dimiinu adi, bwà kuvwija dimiinu adi ne mwoyi, bwalu dimiinu dikaavwa dimanè kwikalaku.

²⁴ Ànu mùdìbi mu cikondo ne cikondo cyònsò, Nzambi ùkaadi mudyànjile kutwàmbila cìikalà mwà kwenzeka mu cikondo ne cikondo cyònsò. Cintu cìmwèpelè cìdì cìMukèngela ndimwèneshiibwa dyà Bukènkè bwà Nzambi pa Mufundu awu, bwà kuwùvwija ne mwoyi bwà cikondo aci. Ànu . . . ? . . . Nènku neàcyènzè pàcidi ànu Bukènkè mwà kufika ku Dìyi. Dìyi dyòdì ditòlwèshiibwe, Nedìdìvwijè ne mwoyi dyòdì diikàle mulayi bwà ditùkù adi.

²⁵ Udi mufwànyine kukùna blé musangu kampànda, anyi lutete musangu mukwàbò. Yimwè yilwa bitekète bishààdile kùdì mikwàbò, bwalu mbilondèshile ku movù.

²⁶ Dìyi dyà Nzambi dìdì dilwa mu movù, mikenji ne ngàsà, ne bikwàbò, bu mutùdì batùngùnùke ne kwenda mu bikondo amu's. Nènku, musangu wònsò, ncikenkesha ku dimwèneshiibwa dyà Bukènkè bùdì munkacì mwà kutangalaja M—Mwoyi ùdì munda mwà Dimiinu adi awu.

²⁷ Ku Dìyi dyà Nzambi, dìbà dìdì dikenkesha leelù ewu, bwalu dìbà mene ditùdì tusànkila edi dìdì Dìyi dyà Nzambi dimwèneshiibwe patòòke. Bukènkè bwine bwà dìbà butùdì tumòna pambèlu ebu bùdì ànu Dìyi dyà Nzambi, pàakambàYe ne: “Bukènkè bwikalèku.”

²⁸ Kàdi ambàbi tũng bu ne Yèyè ùvwa mwambe ne: “Bukènkè bwikalèku,” kàdi kubèngakù kwikala bukènkè nànsha bukèsè? Dìbà adi kàvwa Nzambi uvwa mwakùle nànsha. Pàdi Nzambi wàmba ne: “Kwikalè,” nekwikalè. Ne pa nànkù tudì tujandula dìbà adi ne dìbà ditùdì tusànkila mpindyewu edi ndimwèneshiibwa dyà Dìyi dyà Nzambi dyakula mu Genèsè.

²⁹ Nènku tudì tumanya ne Bukènkè bwà Nzambi bwà ditùkù mMwan'Èndè wa balùme. Ewu ùvwa d-î-b-à; mukwàbò ewu ùdì M-w-â-n-à. M-w-â-n-à ùdì Bible. Yèyè ùvwa . . . “Ku cibangidilu kwàkadi Dìyi, Dìyi dyàkadi ne Nzambi, ne Dìyi dyàkadi Nzambi.” Ebèlù 13.8: “Yèyè ùdì umweumwe awu makèèlèlè, leelù, too ne kashidi.” N'Dìyi dyà Nzambi, misangu yònsò. Úvwa n'Kilistò mu Noà. Úvwa n'Kilistò mu Mòsà. Úvwa n'Kilistò mu Davidi wàkatàngila, bu mfùmù mubèngiibwe, pa cimenga aci; mwaba ùvwà, bidimu nkàmà mwandamukùlù bimanè kupìta, Kilistò musòmbe mwaba awu ùdila mwadi pa cimenga kampànda, mwikàle Mfùmù mubèngiibwe, ànu mùvwà Davidi amu. Cidi misangu yònsò ànu Nyumà wa Kilistò. Ne dimwèneshiibwa mu kaabujimà dyà Dìyi dyà Nzambi dyàkamanyishiibwa ku Yesù Kilistò, Nyumà wa Nzambi.

³⁰ Mwoyi nànsha wùmwe kawèna mwà kulwa kakùyì bukènkè to. Bukènkè bùdì bùpàtula; bukènkè bùdì bùpàtula mwoyi. Kakwèna mwà kwikala mwoyi—mwoyi kakùyì bukènkè to, wà mu bufùki anyi wà nyumà. Bùdì ne cyà kwikalaku.

31 Ne Bukênkè bùdì mwà kulwila ànu ku Dìyì dyà Nzambi. Dìyì dyà Nzambi ke Bukênkè pàdiBu bùmwenèshìibwe. Cìdì ànu Dimiinu ditèèka apa, mùvwà Nzambi mukùne mamiinu ônsò.

32 Mibidi yètù yìwva pa buloba kumpàlà kwà...èè, èè, kumpàlà kwà kwikalakù bukênkè kampànda mwab'ewu, mwoyi kampànda kaaba aka, anyì ní ncinyì cyònsò; kàlìsiyumù, binshidimba, mpiitùloolù, ne bukênkè bwà mu cibwàshìbwàshì, ní ncinyì cyònsò, cìwva apa—cìwva apa pàakafùkà Nzambi buloba apu. Byàkakèngela ànu Dìyì Dyèndè dyakula bwà kudìfikisha ku diikalakù, ànu mwàkenzàci mwoyi wà bikùnuyìibwa, anyì mwoyi wà micì, wà ne, anyì mwoyi kanà wònsò ewu ùdì ne cyà kwikalaku.

33 Cintu nànsha cimwè kacyèna mwà kwikala ne mwoyi, cyà mu bufùki anyì cyà mu nyumà, kakùyì Bukênkè Bwèndè to, ne Dìyì Dyèndè didi Bukênkè ne Mwoyi.

34 Kàdi pàdiYe ùtùma Bukênkè Bwèndè ne ùBùmanyisha kùdì bantu, ne pashìishe Bùbèngiibwa, dìbà adi nudi nwamba bishi bwà aci? Ke citùdì baswè kwakwila aci mu dindà emu, cìdì ne: kubènga kwà Bukênkè ebu, kùdì bàdibo babùtùmine, nkubènga ànu mùvwàbì cikondo aci amu. “Mònaayi musadidi Wanyì, Ùndì musànkilemù.” Yèyè ùdì Bukênkè kùdì bàà Bisàmbà byà bendè. Yèyè ùdì Bukênkè kùdì bàà pa buloba. Yèyè ùvwà Bukênkè bwà bàà pa buloba, kàdi Wàkabèngiibwa. S'ke luseke lwà dibungama ndwòlò alu.

35 Nènku bisòmbèla bitwilangana ne ngiikàdìlù awu musangu wònsò ùdì Nzambi ùmwènesha Bukênkè Bwèndè, buloba bwòbò bwine bùdì bùbènga bukênkè abu. Bwà cinyì? Ncifundiibwe mu Bible mene. Cikondo ne cikondo cyònsò, Nzambi ùkaadi mumanè kwabanya Dìyì Dyèndè bùngì bukùmbàne bwà cikondo ne cikondo cyònsò, ne Yèyè ùtu misangu yònsò ànu ùtùma muntu kampànda bwà kumwenesha Dìyì adi.

36 Yesù ùkaavwa mumana kwamba mu bipròfetà munda mwà bidimu binunu binaayi, bwà ne Yèyè ùvwà ne cyà kulwa, Maasiyà. Ne pàakalwàYe, Yèyè wàkamwènesha mulayi wònsò wà Maasiyà awu. Kàdi nànsha nàнку bantu bàà pa buloba, maèkèleeziyà, ne bikwàbò, kabàvwa bamanýè kantu nànsha kàmwè pa Yèyè to, pa nàнку, bwalu bàkaavwa bamanè kubwela mu cintu kampànda cikwàbò cìwà cibàpangishà bwà kumanya Eci. Mpindyewu ambààyaku tũng bu—bu muntu ànu . . .

37 Netwàngate citùpà cyà mubidi. Kàdi bu muntu, udi mulediibwe panwapa bwà kwendela mu bukênkè bwà dìbà adi awu, bùvwà Nzambi mumufùkile abu, nènku, katanci aka anyì, yèyè kubwita kwìsù kwèndè, kunyeema kukabwela mu nzùbu wa mwinshì mwà buloba, kukànga ciibi, kukànga rìdò, kàdi kubènga ànu bwà kwitaba ne dìbà didi munkaci mwà kukenkesha? Ùdì ùvila dyèsè dyàdì. Ùvila nsèsà yàdì mifidì yà luuya ayi, mushimi mufidì wà mwoyi awu. Ùvila bukênkè

bùdidi ditangalaja bwà wàmòna kùdiye ùya, kùdiye ùfùmina. Ùvila cyôci aci. Ncinyi cyùdi mwà kwambila muntu udi ukànga rìdô, anyi ùnyeemena mu nzùbu wa mwinshì mwà buloba kàdi kujika myaba yònsò yìdi bukênkè bulwelela, myaba yònsò, kàdi ùbènga ànu cyanààna bwà kwitaba ne dîbà òvwa munkaci mwà kukenkesha? Kùdi cintu kampànda cipampàlámùke mu mutù wà muntu awu. Muntu kanà yònsò ewu mmumanyè aci's. Meeji ètù à mu bufùki aa neàkwambilè ne kùdi cintu kampànda cidi kaciyi cyènda bîmpè to kùdi muntu awu, bwà ne yèyè ùdi, ùdi—ùdi. . . . Cintu kampànda ncimwenzèkèle. Mmujiimije ngeelèlù yèndè ya lungènyi.

³⁸ Èè, s'ke mudibi kàbìdi mu mèbà atùdi ne mwoyi, pàdi muntu mwà kudìbwikila ne kabingila kàà—kàà mùshindù kampànda, bwà kwitaba bushùwà Bukênkè bwà Èvànjeeliyò pàdiBo munkaci mwà kukenka mùdiBo bùkenka leelù ewu emu. Dîbà didi muntu ne budiswila bwònsò ùBwèla nyimà, ùkabwela mu cintu kampànda ne ùpwekesha rìdô, wàmba ne: “Mèmè ncyèna nCii tabuuja to,” kùdi cintu cipampàlámùke mu muntu awu. Kakwènakù mùshindù nànsha wùmwe wà kucicinguluka to. Kùdi cintu cipampàlámùke. Cintu kampànda ncimwenzèkèle. Ne tudi tujandula ne mùdi bintu búngì cyanààna, búngì cyanààna byà bwena abi leelù ewu.

³⁹ Mpindyewu, Yesù ùvwa majaaniki ónsò masonsola à baprófetà awu. Ne ciprófetà cyàbò cyònsò cyàkavwijiiibwa ku Bukênkè mu cikondo Cyèndè, cívwa cidyanjila kwamba bwà cikondo Cyèndè aci. Yèyè wàkateemesha kàndeyi kònsò kàà Diyì òvwa mu Bible, òvwa dyamba mu ciprófetà Bwèndè adi. “Virgò neimite difù.” Kwimitaye. Èyo. “Dîna Dyèndè nedibiiikidiibwè ne Mubedyanganyi, Mfùmù wa Ditalala, Nzambi wa Bukolè, Taatù wa Kashidi.” Ke cívwaYe. “Ne mèsù à bampofo neàmonè.” Àakamòna. Cintu cyònsò cívwa cyamba mu ciprófetà Bwèndè aci, cyàkenzeka dîbà dyàkalwàYe pa buloba.

⁴⁰ Ne mbwà cinyi bantu kabàvwa mwà kumòna aci to, cívwa. . . . Mbimwèneka byà pabwàbì bwètù twètù mpindyewu, bwalu tudi tutàngidila paanyimà mu lumwènù lwà cimònànyimà. Kàdi nutukù bamanyè ne, nwènù batùngùnùke ne kutàngila cyànyimà mùshindù awu nenwenzè njìwù anyi? Tùtàngilàayi cidi kumpàlà kwètù bwètù twètù.

⁴¹ Ke cívwbò bènza ncyôci aci. Cyàkenzà ne bènze cyôci aci, mbwalu bàvwa ne mwoyi mu bukênkè butòndòke bwà bukwàbò bukênkè. Bàvwa ne mwoyi mu bukênkè butòndòke bwà bukênkè bwà ditùkù dikwàbò.

⁴² Nènku s'ke cìndi mèmè ngèèla meeji ne ke lutàtù lùdiku ne bàà pa buloba leelù ewu ndwòlò alu, balundà bàànyì, mbwalu tudi tuteeta kwikala ne mwoyi mu bukênkè butòndòke bwà bukênkè bwàkakenkà mu ditùkù dikwàbò. Bukênkè butòndòke mbukênkè bwà mashimi.

43 Ànu mùdì màyi à bakishì mu njila amu. Tudi tupweka ne njila tumòna màyi à bakishì. S'ki mmwènenenu wa mafi wa díbà. Ne paùdì ufikapù, kacivwa cilelè cintu kampànda to ànu cintu kampànda cyà mafi. Bwalu, kwèna mwà kwendela mu bukènkè butòndòke bwà díbà to, bwalu mmâyi à bakishì, àdi misangu yònsò ànu àkuleeja cintu kampànda cidì kaciyi ne bwà nsongo to.

44 Nènku pàdì bantu bàteeta kukwambila ne Yesù Kilistò kèna umweumwe awu makèèlèlè, leelù, too ne kashidi to, bàdi bàkulombola mu màyi à bakishì. Kwàjiki. Ne paùdì ubwela mu èkèleeziyà ne ukashààla wa mu èkèleeziyà, twítabàayi kampànda yà mashika anyi cintu cyà mùshindù awu, kakwèna bwà nsongo muntwamu to, kakwèna cidì citàmbe cyúvwà naaci mu maalu à buloba to.

45 Lekèlaayi nnnwàmbilè. Kanùbengikù Bukènkè bwà Èvànjeeliyò wa Yesù Kilistò to, bùdi bùtwàla nsèsà yà Nyumà Mwimpè pambidi pèèbè, bùkuvwija cifùkiibwà cipyacipyà mu Kilistò Yesù. Kanùteeci bwà kwendela mu bukènkè kampànda butòndòke bwà cikondo cikwàbò to. Mpindyewu, bukènkè butòndòke abu's mbufwànyine kwikala ànu bwimpè mu cikondo cikwàbò aci, mbufwànyine kwikala bwimpè bwàbò bôbò.

46 Cyàkajaadika nànu mu ditùkù dyà Mukalenge wetù Yesù. Yèyè nguvwa Bukènkè bwà mu Mifundu bwà ditùkù adi. Yèyè nguvwa Bukènkè. Yèyè kàvwa Bukènkè abu pàvwàYe kàyi mulwè pa buloba bwà kushindika Díyi dilaya to. Nudi bamanyè's, Yèyè wàkamba mwaba awu ne: "Yone úvwa bukènkè bukolè bùvwà bùkenka, ne nwènu nwanananga bwà kwendela mu bukènkè bwèndè bwà cikondo kampànda."

47 Ncyà bushùwà, bwalu Yone úkaavwa mumana kwamba mu cipròfetà kùdì Yeshàayi, bidimu nkàmà mwandamutekète ne dikumi ne bìbìdì kumpàla kwà dilediibwa dyèndè, ne: "Díyi dyà ewu uvwa mwà kwikala wèla lubilà mu cipèèlà." Ne pashìshe Maalàki kàbìdì, wa ndekeelu wa bapròfetà, bidimu nkàmà yinaayi kumpàla kwà dilwa dyèndè, mu nshapitá mwi3 wa Maal- . . . wa Maalàki, wàkamba ne: "Mònaayi, Ndi ntuma mùsànjeelà Wanyi kumpàla Kwànyì, bwà kulongololayè njila."

48 Ki Yone ewu pànu pa buloba, wenza ne Díyi difùnda adi diikalè ne mwoyi. Yèyè úvwa díyi dyà ewu uvwa wela lubilà mu cipèèlà, ne yèyè úvwa misangu yònsò . . . úvwa kàbìdì munkaci mwà kulongolola njila kumpàla kwà Maasiyà. Ke Yesù kwamba ne: "Nuvwa banangè kwendela mu bukènkè bwèndè, bwalu yèyè nguvwa bukènkè abu, bukènkè bùvwà bukolè ne bùkenka abu."

49 Ki Yone, kwambayè ne: "Mpindyewu ndi ne cyà kupweka, bukènkè bwànyì bùdi ne cyà kujìma, bwalu (bwà cinyi?) ndi mukwàte mudimu mu cyànyì cikondo civwà cyamba mu

cipròfetà bwànyì. Mutèlèlèjaayi Yèyè! Nyèyè Awu. Mulondàayi Yèyè.” Cìvwa ne mwoyi mu ditùkù adi, cyàkashindika cyòci eci.

⁵⁰ Mpindyewu, beena Yudà bàvwa bèèla meeji ne bàvwa munkaci mwà kukuukwila mu Bukènkè bulelèlè. Bàakeela meeji ne bàvwa munkaci mwà kukuukwila, Nzambi umweumwe uvwabò bàdyombola ewu. Ne mwinè menemene uvwabò bèèla meeji ne bàvwa bàkuukwila awu, nguvwabò munkaci mwà kupoopela pa nkùrusè awu. Bàvwa munkaci mwà kwelulwila Nzambi mwinè awu, ne bàMuvwija wa kusekabò kùdi bantu, Nzambi mwinè uvwabò bôbò bèèla meeji ne bàvwa bakuukwila awu.

⁵¹ Swâyikù ngămbè bwalu ebu ne kaneemu kàábúngì ne kaneemu, kàdi bwà kutwàla Bukènkè, bwalu, ànu mwâmbi mwanèètù wa balùme kùkaadi katanci ne, dîbà dikaadi dipite kutâmba munùdi nwènù nwela meeji ne ki citùdi. Dìmwè dyà ku matùkù àdi panshi aa cintu kampànda necyènzekè, dîbà nedîikalè dimanè kupita bikolè. Bantu nebàtwibwè cimanyinu cyà nyama wa lwonji, kabàyi nânsha bamanyè cidîbo bènza aci to. “Mpofo ùlombola mpofo, bàdi bàdishinda bônso mu mùkidi,” ke mwàkambà Yesù. Tudi ne mwoyi paanyimà menemene kupita mutùdi twelela meeji. Bantu bàábúngì bàà meeji matòoke batu bàlonda aci, kabàyi nânsha bamanyè cidîbo bènza to.

⁵² Kàdi dîbà dikaadi pabwîpì mpindyewu pàdi Bukènkè bùkenkesha apa, Bukènkè bwà Èvânjeeliyò, mu bukolè Bwendè bwà dibîikà Dyà ku lufù dyà Yesù Kilistò, ùDìmwènesha Yèyè mwinè ne Yesù Kilistò ùdi umweumwe awu makèlèlè, leelù, too ne kashidi. Wàkalongolola aci bwà ditùkù edi. Bintu byàkalayàYe bwà ditùkù edi bìdi ne cyà kwenzeka mu ditùkù edi. Èkèleeziyà yèyè kàyì ùCìitaba to, Nzambi ùdi ne bukolè bwà ku mabwe aa kujuudila Abraham bàna. Yèyè neàjikijè Mukenji Wèndè, bwalu Yèyè ùkaadi misangu yônso ànu mucyènzènze. Yèyè neàcyènzè misangu yônso.

⁵³ Bantu batu bèèla meeji ne bàdi bènda mu Bukènkè, bilèlè byà baataatù, nènku, katanci aka anyi, bàdi bènda mu bukènkè butòndòke bwà bukènkè, kî m'Bukènkè bùmwebùmwe abu to, babènge Bukènkè bwinè bùdîbo bàmba mùdîbo munkaci mwà kukuukwila abu.

⁵⁴ Byenzedi Byèndè byàkashindika ànu menemene ne Yèyè ùvwa Nganyi. Yesù wàkamba, Yèyè mwinè ne: “Kenketaayi Mifundu, bwalu mu Yòyi amu mmunùdi nwela meeji ne nudi ne Mwoyi wà Cyendèlèlè, ne Yòyi ayi's ke Yìdi yimfidila Mémè bujaadiki. Nganyi udikù mwà kuMpiisha bwà mpèkaatù?” Yèyè wàkamba ne: “Nganyi udi mwà kujaadika ne ndi mwâmbè ní ncinyi ní ncinyi, anyi ní ndiyi kaayi Dìndi mwâmbè, cidi Taatù wa mu Dyulu kàyì mushindikile munda Mwànyì?” Munùjaadikile ne Yèyè nguvwa Bukènkè bwà dîbà adi, bwalu cyònsò cikaavwa cyamba mu cipròfetà ne Maasiyà ewu neikalè

mùshindù ewu, ne apa ncyèlè cilongò cyà Mwoyi, kàdi bilèlè byàbò bivwa bibàtàpùlùla ne Bukènkè bulelèlè bwà Dìyì.

⁵⁵ Bàfaalèsà, Bàsadokà, beena Helòòdè, ne cyònsò cidi cifwànyine kwikalakù aci, bàvwa ne maalu à pa buloba matàmbe kunyangakajiibwa, bu mwàkenzàbo mu bikondo byònsò, mu mùshindù wà kabàyikù mwà kumòna Bukènkè bulelèlè nànsha. Bwàkashipa mèsù àbò. Bàvwa ne ciibidilu cyà kwendela mu bukènkè butòndòke ne: “Ditùkù dyàlondà neciikalè *cikampànda*, ne mààlabà neciikalè *cikansanga*. Netùkashààlè bàà mu *cikampànda*, ne neciikalè *cikansanga*. Netùkashààlè bàà mu *cyàcyà*.” Tudi tusangana ne mmàyi à bakìshì à mafi.

⁵⁶ Yesù Kilistò ngwa cyà bushùwà leelù ewu, kùdi mwoyi wà muntu, ànu mùvwàYe kwònsò ne kwònsò aku amu. Bukolè Bwèndè ne Bwikadi Bwèndè bùdi ne mwoyi bùdi ànu bulelèlè leelù ewu ànu mùvwàbu kwònsò kwònsò eku amu. “Mònaayi, katanci kakesè aka, bàà pa buloba kabààkuMmòna kàbidì to. Kosmos, ‘ndongolwelu wa buloba,’ kabààkuMmòna kàbidì to. Kàdi, nwènù nenùMmònè; bwalu Nèngiikalè neenù, munda mwènù mene, too ne ku ndekeelu kwà buloba. Byenzedi bìndì Mèmè ngèza nenùbyènzè pèènù, nenwènzè too ne binène bipité ebi, bwalu Ndi nya ku Taatù Wanyì.”

⁵⁷ Mulayì munène awu ùdikù leelù ewu. Bàà pa buloba mbampofo ànu menemene ne mwàbò mwònsò, kàdi kùdi “nwènù bààmMònà,” nènku ku cyòci aci nkutùdi tuteeta bwà kufika leelù ewu. Cidi Èvànjeeliyò mu kaabujimà, ùmvwija, nkujikula Yesù Kilistò mu bukolè bwà dibiikà Dyèndè dyà ku lufù, ne kaabujimà kwònsò kàà milayì Yèndè; bwà ne Nyumà Mwimpè wàmwènesha bintu ebi ne kubilongolola, byàkalayà Nzambì, ne Yèyè neàcyènzè. Èyowà’s, mukalenge.

⁵⁸ Yèyè ùvwa mushindikiiibwe ànu menemene kùdi—kùdi Dìyì ne ku byenzedi bivwàYe wèza, kàdi nànsha umwe wa kùdìbo kààkaswakù kuciitabuuja to. Wàkajaadika ne Bukènkè Bwèndè bùvwa n’Dìyì! Dìyì ndidì dicyàmbè ne: “Kenkètààyi Mifùndu.”

⁵⁹ Kàdi bilèlè byàbò bivwàbo basòmbèlemù abi, bukènkè butòndòke bwà cikondo cikwàbò! Bààkamba ne: “Twètù tudi twitabuuja Mòsà; Mòsà ke utùdi twitabuuja ewu. Katwèna bamanyè kùdi Wèwè mufùmìne to. Nkwepì kùdi Wèwè mulongèle kàlaasà? Ncinyì cyùdi Wèwè mwà kushindika naaci ne Wèwè *Cikampànda*?”

⁶⁰ Byenzedi Byèndè byàkafila bujaadiki ne Yèyè ùvwa Nganyì, bu bóbò nànsha babalèku Bible. Bàvwa bàMubala, kàdi kabàvwa mwà kuCimòna to. “Byenzedi Byànyì bìdi bìMmanyisha.”

⁶¹ Muntu ùtu ùmanyikila ku yèndè mikàndà yà dijaadikiibwa naayi, dijaadikiibwa dyà Dìyì dyà Nzambì, yèyè mutùmiiibwe kùdi Dìyì dyà Nzambì ne mwikàle ne Dìyì dyà Nzambì.

Ncimwècimwè aci mu cikondo ne cikondo cyònsò! Ke mùtùbi misangu yònsò.

⁶² Katwèna mwà kwikala ne mwoyi ku bukènkè bwà makèèlèlè abu to. Bukènkè bwà makèèlèlè mbwalu-bulonda. Katwènakù bamanyè kantu nànsha kàmwè pa bwòbò abu to. Kwèna mwà kupeta luuyà leelù ewu ku dîbà dîvwà dîkenkèsha makèèlèlè awu to. Ke lutàtù lùdi naalù maèkèleeziyà leelù ewu ndwòlò alu. Ki lutàtù lùdi naalù bantu ndwòlò alu, bàdi bàteeta kwikala ne mwoyi ku cîvwà cyenzèke makèèlèlè awu. Kwèna mwà kupeta luuyà ku kapyà kazòla to. Nànsha kakesè, kakèèna ne luuyà munda mwàkù to. Muunya wà makèèlèlè awu kawèna ne luuyà munda mwàwù to.

⁶³ Bukènkè bwà dîbà mbutùmîibwe pa buloba, mu bufùki emu, bwà kubobesha lutete bwà ditungunuka dyà kunowa. Ditùkù dyònsò didi dîpàtula dîbà dipyadipyà. Dîbà didi munkacì mwà kuteema leelù ewu adi, didi munkacì mwà kukolesha blé mu Canada; dîbà dîmwèdimwè adi, èè, bu ne kakùvwa . . . kakùvwa dîbà dikole kupîta adi to, ngondo wa kashipunkènzà ulwàlwà ewu anyi wa cimungu wa mashika, kadîvwakù mwà kubobesha lutete nànsha. Didi ne cyà kwikala ne dikàndà ditàmbidile ne ne bukolè butàmbidile, ditùkù dyònsò didi dikola ne dipwila, bwà kukwàma lutete.

⁶⁴ Mpindyewu pîikalà lutete, lwòlò lwìnè, lubange kuboba, lutete lùdi lùtungunuka, wòwò mushàale ànu ne lutete, ùdi ànu ùfwimba lutete. Ditùkù dyònsò, kazubuzubu kàdi kàdinyùngùlùkile, ci—citùpà cyà kàlisiyumù ne cyònsò cidì cibwelàmu aci, cidì cidîbaka ànu munda mwà lutete amu, pàdi dîbà dyènda dikola apu.

⁶⁵ Kàdi angàtà dîbà didi dîkenkeshà mu ngondo wa cimungu wa mashika adi, ne ùditèèkè pa blé leelù ewu, s'ndifwànyine kumushebeya. Cyà bushùwà, kwèna mwà kwenza nànkù to. Cidi ne cyà kulwa mu movù wàci. Nànkù ke mùdi blé wa Nzambì ne lutete lùboba ànu mu movù menemene, mu movù ùdiCi cîsanganyiibwamù awu. Kàdi mmunyi mùvwàkù dîbà. . . Èè, blé's mmufwànyine kufwà, mamuma's mmafwànyine kufwà, ku dîbà didi ne mwoyi leelù ewu, didi dîkenkeshà leelù ewu adi's wè. Dinowa dyàdi didi munkacì mwà kulwa didi dyènda dîboba. Lutete lùdi ne cyà kuboba ne bukènkè.

⁶⁶ Kàdi bwalu bùdi ne, leelù ewu, lutete lwà èkèleeziyà kî nduswè kuboba to. Nduwè kushàala bu mùvwàlu mu cikondo cyà Moody, Sankey, Finney, Knox, Calvin amu. Bàvwa ànu bîmpè, bàvwa bukènkè bwà dîbà adi.

⁶⁷ Kàdi edi's ndîbà dikwàbò. Edi's ndikwàbò ditùkù. Edi ndiya dyà kumpalà dyà Èvànjeeliyò; mMutàngila ku diboba dyèndè. Pa nànkù katwèna mwà kwikala ne mwoyi mu cîvwà Luther mwambè to, cîvwà Wesley mwambè, anyi bàmwè bàà kùdîbo to. Tudi ne mwoyi mu Bukènkè bùdi budyànjlila kwamba

bwà ditùkù edi. Tudi mu cikondo cyà mwandamutekète cyà èkèleeziyà, kî ncikondo ciisâtù anyi ciinâyì cyà èkèleeziyà to. Lutete lùdi ne cyà kwikala lukùmbàne bwà kuCyàkidila. Lwôlò kalùyì luCyakidile to, lùdi lùmata ne kalwèna ne cidilu lùmvwija nànsha. Lutete lùdi lùkola ne Bukènkè pàdilu lùtùngunuka ne Bukènkè.

⁶⁸ Ki mùvwà kàbìdi èkèleeziyà ne cyà kutwàla dyâmpà dyà cikondo ne cikondo cyônsò, dyàkatùmà Yesù dîyi, ne: “Muntu neikalè ne mwoyi ku Dîyi dyônsò didi dîpàtukà mukana mwà Nzambi.”

⁶⁹ Dyâmpà ditùdi naadi dijinga didi mu Bible. Ndibuulula mu kaabujimà dyà ndongamu wa Nzambi. Ndibuulula mu kaabujimà dyà Yesù Kilistò. Katwèna tusàkidilaKù kantu nànsha kàmwè to, anyi tuumushilaKù kantu; ewu yônsò udi wenza nànkù, dînà dyèndè nedyùmushiibwè mu Mukàndà wà Mwoyi. Katwèna dijinga ne twitabàayi kampànda bwà kusàkidila ku Eci to. Ncifunda ànu mùshindù ùdiCi ne cyà kwikala awu. Katwèna tusàkidilaKù kantu nànsha kàmwè to, katwèna tuumushilaKù kantu nànsha kàmwè to, tuCiyiisha ànu mùdiCi amu, ne Nzambi ùdi, neàcimwènèshè. Mulayi wônsò wàkalayàYe, Yèyè neàwùmwenèshè ànu mùshindù ùmwèmwè awu. Katwèna ne cyà kuumushilaKù anyi kusàkidilaKù to. Ànu kuCishiya mùshindù ùdiCi awu.

⁷⁰ Kàdi, nudi numòna’s, leelù ewu, tudi tusangana bantu ànu bu mùvwabi mu ditùkù adi amu, bàteeta kwikala ne mwoyi mu bukènkè butòndòke. Bivwa bikèngela bwà èkèleeziyà àbobè bu mùdi blé ùboba, “bwà muntu kiikadi ne mwoyi ànu ku dyâmpà nkàayadi to, kàdi ku Dîyi dyônsò dyà Nzambi, Dyâmpà dyà Mwoyi.” Kaciyi ànu katùpà kàà Méyi to; Dîyi dyônsò dyà Nzambi, cikondo ne cikondo cyônsò! Kùshàadi ànu udyà nkunde ne bilungà byà mpàtaata dîbà dyônsò to. Kùdi bimwè bintu bidì byèndela pàmwè ne cyôci aci, patùdi tutùngunuka dilondangana dyà Didya dinène dyà Nzambi didi ditèeka kumpalà kwà Bantu Bèndè adi, bukolè bwà Nyumà Mwimpè, di—dicyòkomoka bwàDì, bwà bukolè ne Nyumà bidì bifidiibwe abi’s. “Byenzedi bìndì Mèmè ngèza nenùbyènzè pèènu. Bwalu Ndi ne mwoyi, nwènù pèènu nudi ne mwoyi.” Milayi yàkenzelà Yesù Èkèleeziyà Wendè ayi, kàdi nànsha nànkù leelù ewu tudi tusangana bantu bàteeta bwà kwalukila buludì mu cikondo cikhwàbò kampànda cidì cimane kupita.

⁷¹ Cikondo cyà Luther, cìvwa ncikondo cinène. Yèyè wàkamòna ciléma cyà èkèleeziyà wa Kàtòlikè, wàkamòna mèèsà à Mukalenge. Bwà ne, nsaserdòsè wa citende awu, kumònayè ne aci cìvwa cyà mafi, “kacìvwa mubidi mwena diinà wà Kilistò to,” cìvwa nkapese kàà dyâmpà kà—kàvwàbo babènèshe. Ki yèyè kumòna aci ne: “mvinyò kàvwa Mashi meena diinà to,” kàdi cìvwa cìleeja Mashi. Ki kutontololayè cintu aci bwalu dîbà dyà cikondo aci dikaavwa dikùmbàne. Nànsha bàmba ne bàvwa

ne bansaserdòsè búngì kaayi, ne bikwàbò kàbìdì bìvwàbò naabi abi, Nzambi wàkapyà muntu uvwa mwà kuteemesha bukênkè. Amen. Wàkiitaba ne: “Dibingishiibwa ku diitabuuja,” ne wàkenza bwà bukênkè bwà cikondo cyà ba-Luthériens búkenkè. Pashiishe aci kutungunukaci, aci cyàkajikija cyàci cikondo.

⁷² Kùlwakù cikondo cikwàbò cìvwà èkèleeziyà ne cyà kuumuka ku mpèkaatù yèndè, ne kujidiibwa. Pashiishe kulwakù John Wesley, muntu mukèsè wa ba-Anglicans wa mu Angleterre mwàmwa, uvwa wa mu èkèleeziyà wa ba-Anglicans, kàdi yèyè wàkamona bukênkè pa Èvànjeeliyò. Divwa ndìbà bwà Cíkondo cyà Filàdelèfiyà aci kupàtukaci. Nènku pààkenzàye nànkù, wàkayiisha cyenzi ciibìdì cyà ngàsà, dijidiibwa ku Mashi à Yesù Kilistò. Kakùvwakù cintu nànsha cimwè cìvwà mwà kwimana mu bukênkè bwàci to. Yèyè wàkabadiibwa bu mukoleshi wa maalu ànu mùvwà Luther amu, kàdi yèyè wàkatonolola cìvwà bakwàbò bònsò abu, ne wàkakenkesha bukênkè, bwalu bìvwà mbukênkè bwà dìbà adi. Nzambi kupeta muntu, John Wesley, uvwa mwà kuteemesha bukênkè abu awu.

Wàkasanganyiiibwa kàbìdì pa...ne Luther, wàkateemesha bukênkè bwà cikondo aci awu.

⁷³ Pashiishe kulwakù bânà bèètù beena Mpenta. Kwalukilabò mu cikondo cyàbò, cyà dyalujulula dyà mapà, kwalujulula mapà, à dyakula dyà mu myakulu, mapà à dyondopa, ne bikwàbò kùdì èkèleeziyà. Mpindyewu, bààkenza ànu menemene cìvwà Mifundu myàmbe ne nebènzè aci, nènku, pààkenzàbo nànkù, bààkacimwènesha. Ncyà bushùwà menemene.

⁷⁴ Kàdi nuvwakù bajingùlùle ne tudi buumùke ku cyòci aci anyi? Tudi mu cikondo cyà Mukàjì-musèla, cikondo cyà disòbola, cikondo cidì (Mukàjì-musèla) cìvwàbò bàmbe ne netwikalè naaci. “Cyònsò cìvwà mukùmbi ùdi ùpòòpola mushiye,” mmùdì Yowèlè 2.28 mwàmbe, “cyònsò cìvwà mukùmbi ùdi ùpòòpola mushiye, mu—mukùmbi ùdi ùkòsa wàkacidyà; ne cyònsò cìvwà mukùmbi ùdi ùkòsa mushiye, mukùmbi ùdi ùlela bânà bààbúngi wàkacidyà.”

⁷⁵ Dyònsò dyà ku malongolodi awu, pawikalà mubale Bitampì Mwandamutekète byà Bible abi, yònsò wa ku balongolodi bònsò abu wàkapàtuka ne kukayiishayè Dìyì, kàdi wàkalekela cintu kampànda. Pashiishe cyàkenzàbo ncinyi paanyimà pàà balongolodi bamane kujika, ne bukênkè kubangabu kujìma? Pamutù pàà kwendelabò mu Bukênkè butàmbe bunène, bààkacìvwija bulongolodi. Nènku pààkacìvwijàbo bulongolodi ne: “Tudi twitabuuja Bukênkè *ebu*. *Eci ki* Bukênkè! *Eci ki* Bwòbò.” Cyàkenzàbo ncinyi? Ki Wesley kupàtukayè ànu mu cyòci aci e kuya mushidimbe ne lwendu umuka kùdìbo.

⁷⁶ Wesley wàkenza cinyi? Wàkadyènza bulongolodi paanyimà pèndè, ne mwanààbò—mwanààbò, John ne—ne Charles, ki

pashiishe kulwaku Asbury ne bakwàbò abu, ne, paanyimà pàà matùkù abo awu, kwenzabò bulongolodi bwàkabèngiidiibwà ne ng'èkèleeziyà wa ba-Méthodistes abu. Bààkenza cinyi? Bààkabènga Bukènkè butàmbe bunène. Bààkamba ànu ne: “*Eci* ki Bukènkè. *Eci* ki Bwòbù.”

⁷⁷ Pashiishe kulwakù beena Mpenta ne kubàleejabò ne, Nzambi ùcìdi ànu ùtùma dibàtiiza dyà Nyumà Mwímpè. Yèyè ùcìdi ànu ùpwekesha bukòlè Bwèndè bwà dyondopa, bùdìbo bóbò bavilè abu. Bààkenza cinyi? Bààkaya buludì kule naabò, bwalu cìvwa m'bukènkè bukwàbò.

⁷⁸ Ncinyi aci mpindyewu? Tukàadi bapìte bidimu bitwè ku makùmi àsambòmbò, kùdi beena Mpenta badìvwijè bulongolodi ne: “Twètù tudi *cikampànda*, tudi *cikansanga*,” nènku ki Nzambi kupàtukamù; pambèlù pàapa, ne kupàtula Mukàji-musèla, Musungula awu, mu kasumbù aku. Bwalu, kakwàkwikalakù cìkwàbò cìkondo cyà èkèleeziyà to. Cìkondo cyà Èkèleeziyà wa Filàdèlèfiyà cìvwa ng'Wesley. Ne Cìkondo cyà Èkèleeziyà wa Laòdikiyà mbulongolodi bwà beena Mpenta, bùdi bwònsò bùya buludì mu cimanyinu cyà nyama wa Iwonji. Aci's m'Bible, ànu mùvwà mwanèètù wa balùme ewu wàmbe kùkaadi katanci amu. Aci's ncilelèlè. Cyà bushùwà. Bàdi nànkù, malongolodi ónsò awu, bwalu bààkabènga bwà kwendela mu Bukènkè butàmbidile. Bàdi bàdivwija bulongolodi, bàmba ne: “Tudi twitabuuja *cikampànda*.” Pàdi Nzambi wènza cintu kampànda, cikenkètaayi ne Mifundu.

⁷⁹ Bàfaalèsà kwambabo ne: “Tudi naaCì.” Basàdokà kwambabo ne: “Tudi naaCì.” Kàdi Nzambi nguvwa naaCì! Nzambi kunyungulula nsapì ne kuleeja Bukènkè. Bwàkabèngiibwa ànu mùvwàBu misangu yònsò amu.

⁸⁰ Èkèleeziyà wa Kàtòlikè wàkabènga Luther. Wesley wàkabènga Luther. Ne pa nànkù beena Mpenta bààkabènga Wesley.

⁸¹ Ne Nyumà Mwímpè leelù ewu ùdi munkaci mwà kubèngà beena Mpenta. Nudi nwenda nushàala ànu ne mmwènekèlu wa kwìsùkwìsù ne bakwàte mashika ànu mùdi bakwàbò abu amu. Bantu bònsò bàdi mwà kumòna aci. Mémè ndi munùangè. Nwènu's ke cintu cidi citàmbe kwikala pabwìpi ne Bible, cìndiku mumanyè, ki bwà cinyi ndi neenù. Kàdi, tèelejàayi, kàngulàayi mèsù bwà kumòna ditùkù ditùdi ne mwoyi edi! Dìbà dyàkànyì dyà nsapì kunyungulukayi cyàkàbìdì, ne bwà Bukènkè kulwabù, bwà kupàtula Mucì. Bible mmwàmbè, mu Maalàki 4 ne: “Yèyè neàtumè ne neàlujululè Diitabuuja dyà ku cibangidilu divwàku adi kùdi bantu.” Yèyè ngudi mulaye nànkù. Ùkaadi misangu yònsò ànu mucyènzènzè. Wàkatùma Dìyi Dyèndè, ne bapròfetà bààkalwa bwalu Dìyi divwa dilwa kùdi bapròfetà, ne bàvwa ne Dìyi ne baDivwija ne mwoyi.

⁸² Malongolodi ne ndongolwelu byà cikondo aci byàkabàbènga, cikondo cyònsò, ànu nànkú ke mwàcyenzàbo leelù ewu. Nzambi ùdi ne bukolè leelù ewu bwà kujuula muntu ànu mùvwàYe musangu awu amu. Kacya Yèyè kàakajuulakù malongolodi to. Konkàayi mulongi yònsò wà maalu à kale, tàngilàayi mu maalu malonda; pàvwà ànu bulongolodi bùdìlongolola, bùvwa bùfwa ànu mwaba awu ne kabùvwa bùjuukuluka cyàkàbìdì nànsha. Nzambi ùtu wàkula ne bantu-nkààya. Cyà bushùwà.

⁸³ Ne Nzambi mmulayè bwà kucyènza cyàkàbìdì mu matùkù à ndekeelu, ne Yèyè neàcyènzè. Cìdì Nzambi mulayè, Yèyè neàcyènzè, bwà kuteemesha Bukénkè bùdì mwà kushindika Mifùndu milaya yà leelù eyi. Yesù wàkamba ne: “Ànu mwàkadibi mu matùkù à—à Lotà, ki mwìkalàbi kàbìdì ku dilwa dyà Mwànà wa muntu.” Udi uleeja, udi umòna cidìbo bènza aci. Tàngilàayi Yèhowàh, cidìYe mwenzè, Taatù wetù mmutèèke byònsò pa kaaba.

⁸⁴ Kùdi Lotà pa buloba, mu Sodomà mwàmwa, ne mpèkaatù yònsò, wa civùmvù awu. Kùdi mùsànjeelà kuntu kwàka ùmuyiisha, pèndè.

⁸⁵ Kùdi kasùmbù kàà Abraham, Basungula, bapàtùdiibwe, aba bàdì ne mulayi awu, bindile cyà bushùwà Mwànà awu. Lotà ùvwa pèndè mwindile mwànà wa balùme, kàdì kàvwa mu mmwènèkelu uvwa Abraham ùmukèba awu to. Cyàkenzekà ncinyi? Ànu pabwìpì menemene ne kwenzekaci, Nzambi wàkatùùluka ne kuDimwènesha mu mubidi, ne kwamba patòòke ne Yèyè ùvwa Diyì, bwalu: “Diyì dyà Nzambi nditwè kutàmba mwelè wà mvità wà nseke yibìdì, ne dijinguludi dyà meeji àdì mu mwoyi.” Yesù wàkamba ne: “Ke mwìkalàbi kàbìdì, ku dilwa dyà Mwànà wa muntu.” Milayi eyi yidi yà Nzambi, bàakayaàkula kùdì mishikù yà Yesù Kilistò. Maulu ne buloba byònsò bìbìdì nebìpangile, kàdì Yòyi kayàdyàkupangilakù nànsha. Nzambi ùcidi ànu ne bukolè bwà ku mabwe kujuudila Abraham bânà. Kaa, èyowà’s!

⁸⁶ Tudi mu lwendu lwètù, tudi bu mùvwà Izalèèlà amu. Izalèèlà, mu lwendu lwàbò alu, bìvwa bìkèngela kwikalabò ne manà mapyamàpyà ditùkù dyònsò, bwalu manà mapyamàpyà àvwa àmata. Katwèna ne cyà kwikala ne mwoyi mu bukénkè bwà Luther to, kwikala ne mwoyi mu bukénkè bwà—bwà Wesley, anyi kwikala ne mwoyi mu bukénkè bwà Mpenta to. Tudi mu cikondo cikwàbò, Manà mapyamàpyà.

⁸⁷ Cìvwà cyènzeka ncinyi pàvwàbo bàteeta bwà kulama manà kusambwisha ditùkù? Àvwa àbola. Àvwa mwà kubàshipa. Ki bwà cinyi tudi ne bafwè bàà mu nyumà bùngì cyanààna, beena Kilistò bàà ku dìnà. Bàdì bàdya bukénkè butòndòke bwà ditùkù dikwàbò. Bàdì bàdya manà àkaadi matàpile twìshì awu. Ànu mùdì kazubuzubu pa blé amu, kòkò kakàyi kàbwele mu blé to, kàdì kàpàtuka mu blé. Ne pàdì Bukénkè

bùbèngiibwa, kakwènakù cintu nànsha cimwè cyà dyenza to, mbukùdimunyiibwe midimà. Katupà kanà kònsò kàà dilòlò edi, kàdi kafwànyine kubènga kumòna Bukènkè aku, kàdi kààlukila mu midimà. Ke mùdibi kàbìdi ne mu Èvànjeeliyò, mu cikondo ne cikondo cyònsò mbijaadikiibwe ne bìdi nàнку. Tudi ne mwoyi mu ciinè cikondo aci.

⁸⁸ Manà à makèèlèlè awu mmatàpile twishi. Ntu ngùm vwa bantu bamba ne: “Kùkaadi bidimu makumi ànaayi, mvwa mwenze *cikampànda*.” Ncyà bushùwà, kàdi bìshi bwà leelù ewu? Kàdi bìshi bwà èkèleeziyà mukwàte kapyà? Tudi twakula bwà makèèlèlè awu, kàdi bìshi bwà èkèleeziyà leelù ewu? Kàdi mbishi bwà wèwè bu muntu-nkààyà leelù ewu? Bwalu, à makèèlèlè awu kaàkukumbàna bwà leelù to. Àvwa mimpè makèèlèlè awu.

⁸⁹ Mukenji wà Luther ngùvwà bukènkè bwà dibà adi, mùvwà wà Yone amu, kàdi kwàkajuuka bukènkè butàmbe bunène. Ke mùvwà Luther bukènkè bunène, ne twàkamusànkidila bwà muvù kampànda, kàdi kwàkalwa bukènkè bukwàbò bwàkajimà bwèndè abu. Cìvwà cìkèngelà kwenza cìvwa nkubwelakanangana naaCi; ne Cyàkatùngunuka too ne ku mulungu mupwàngàne wà Dyàmpà, kutùngunuka too ne ku Manà mapwàngàne à Nzambi. Kàdi bàakenza cinyi? Bààkadìvwija bulongolodi. Muntu kubwelamù. Pamutù pàà Nzambi kucilombolayè, muntu ne ndongolwelu yèndè kudìtwamù, e kucifofomeja mèsù.

⁹⁰ Kaa, Muci-Mukàji-musèla ewu leelù ewu, mmusònta. Ditambà dyònsò didi kadiyi dikwàma mamuma adi ndisònjiiibwe. Ki mwàkambà Yesù, Yone Munsantu 15. Cidi cyenzèke mpindyewu eci, tudi tumòna ne mbakòshiiibwe, basònjiiibwe.

⁹¹ Vùlukàayi ne, mwoyi mwinè wà mucì awu ùdi ànu munkacìnkacì menemene mwà mucì. Cimuma necìbobè misangu yònsò, mwaba wà ndekeelu wikalà mucì mwà kukwàmina cimuma, ùdi ànu ku lusongo lwàwù aku, bwalu nciteleela cidi cìfùminà munkacìnkacì mwà mwoyi wùdi mu dimiinu awu.

⁹² M’Muci-Mukàji-musèla. Yesù ùvwa Mukàji-musèla, Yèyè ùvwa Muci. KuMushimbulabò. Yèyè ùvwa Muci wà Mwoyi ùvwà mu budimi bwà Edènà awu. KuMushimbulabò ne kuMukùdikabò ku mucì wà cyena Loomò, bwà kuMwelulwilabò. CyàkenzàYe ncinyi? Nzambi wàkaMubiisha ditùkù diisàtù, ku bafwè. Nènku leelù ewu kùdi Muci-Mukàji-musèla; Wàkabangila kale wàwa ku cibangidilu, kale menemene mu Ditùkù dyà Mpenta.

⁹³ Tèèlejàayi, nwènu bàdi bàà mu èkèleeziyà! Èkèleeziyà kacya kààkabangilaku ku Nicée, ku Loomò nànsha. Wàkabangila mu Yelusàlèma, mu Ditùkù dyà Mpenta, ndyàkabanga Èkèleeziyà. Pashiishe cyàkenzàbo ncinyi? Bààkatùngunuka ànu

ne kudivwija bulongolodi; ne Nzambi pèndè mmutùngùnùke ne kwenda kukòsa matàmbà. Pashiishe kuvwijabo ba-Luthériens bulongolodi; kukòsabò matàmbà. Wesley; kukòsa matàmbà. Mpenta; kukòsa matàmbà. Too ne mwalubi. . .

⁹⁴ Kàdi Nzambi neikalè ne Muci-Mukàji-musèla! “Byònsò byàkadyàbo kùdi mukùmbi ùdi ùtùpika ne mukùmbi ùdi ùlela bânà bàbùngi wàkabidyà, Mémè nèngààlujululè,” mmùdi Mukalenge wàmba. Maalàki 4 ùdi ùtwàmbila ne netwàlujuludiibwè ku Diitabuuja dyà ku cibangidilu bu mwàkadibi mu Ditùkù dyà Mpenta, ne: “Diitabuuja dyà baataatù.” Tudi twitabuuja ne nedilwe. Ndi ngiitabuuja ne díbà dyàkànyì dyà bwalu abu mpindyewu. Matàmbà mmuuminýine ne muume ncyon, ne nebiikalè bàwùmusha ku Muci, bwà ne cimuma cyàmòna mwà kukwàmina nkààyaci ànu lwà mu lusongo lwà Muci amu. Kaa, ekèlekèle!

⁹⁵ Makènkè ònsò aa mmimpè. Èkèleeziyà leelù ewu ùdi bukènkè abu kusangisha ne bùdiye mupete leelù ewu. Mbwà kujikija dinowa. Patùdi tujandula ne, Muci wòwò mwinè, anyì. . . Blé udi ne cyà kuboba ne Bukènkè abu, wènda ùbànda kuumukila ku dibèji too ne ku lutete, ne kuumukila ku lutete kutùngunuka. Lùdi lùboba ne Bukènkè. Bukènkè bwà bikondo bikwàbò bùdi ànu bùfila bujaadiki bwà cikondo eci. Bukènkè bwà Luther bwàkafila bujaadiki bwà—bwà bukènkè bwà Wesley. Wesley ùvwa ùfila bujaadiki ku bukènkè bwà Mpenta. Mbukènkè bùmwebùmwe abu, bwàkaboba ànu ku Bukènkè. Bu bantu mwà kubùmòna’s wè!

⁹⁶ Kukaadi cikondo kampànda, mvwa mbala kaabwalu kampànda kakesè, mùvwa mukalenge-mukàji wa Angleterre, (kí mmukalenge-mukàji udikù ewu to) mukalenge-mukàji mukwàbò awu, wàkaya kamòna kùmpànyì wa mabèji uvwa wenzenza mabèji malenga à dikèma. Nènkù pàvwàbo bàyuukila nendè muyiiki wà bàbidi kùdi mfùmù wa kùmpànyì awu, wàkamupìcishilamù. Yèyè ùvwa ùjinga kumòna mùshindù ùvwa mabèji malenga ènjjibwa. Yèyè kumwangata ne kumuleeja byamù byònsò ne bikwàbò. Ne mu miinè matùkù awu bàvwa bènza mabèji ne bikùsukusu. Tudi bavùlùke bìmpè cintu aci. Ki kubwelaye mu cibambalu kampànda e kuunzululayè ciibi, kàdi mùvwa ànu mushiki wà bikùsukusu. Mukalenge-mukàji awu, mu dikèma, wàkamba ne: “Bintu byà bukooyà ebi mbinganyi?”

⁹⁷ Muntu uvwa. . .mfùmù wa kùmpànyì awu, kwambaye ne: “Bivwa mbilàmbà, makèlèlèlè. Nwamònu’s, mbishààle bukooyà. Katwèna tubimansha to, kàdi’s ki dibèji dyà mààlabà.”

Yèyè ne: “Ncyèna ngùm vwa eci to.”

Yèyè ne: “Neùcyùm vwe mààlabà.”

⁹⁸ Nànkù díbà dyàkàpicishilàbo bikùsukusu abi mu cyamù, mu dilonda dyà njila kampànda wa disukula, ne—ne cintu kampànda mùvwàbi mwà kupicila, njila kampànda; díbà

dyàkapàtukàbi, cìvwa mmabèji malengalèngàayi. Mfùmù wa kùmpànyì ùvwa wèla meeji ne neàleejè mukalenge-mukàji awu cintu kampànda cìvwàye kacya kàyikù mumanyè to. Kì kutèekayè mpàla wendè pamutù apu, ne kumulamika pa dibèji dilenga. Dìbà dyàkadìpetà mukalenge-mukàji, yèyè kumònayè mpàla wendè mu cìvwa bikùsukusu byà bukooyà, makèlèlèlè aci, bwalu cyàkapìcila mu njila kampànda.

⁹⁹ Kaa, bu Luther, Wesley, ne bôbò bônso abu, mwà kumòna aci, bwà ne cintàkanyì cyà makèlèlèlè aci bàdi ànu mwà kukwàta naaci mudimu bu cyòci mwà kupicila mu njila kampànda! Pàdi Nyumà Mwímpè ùbuulula Bukènkè, kuumukila ku dibingishiibwa too ne ku dijidiibwa, ku dibàtiiza dyà Nyumà Mwímpè, nènku mpindyewu dìbà dyà ndekeelu dyà Dilwa dyà Kìlistò; ndibwele mu cimfwànyì, kaciyì cyà mukalenge-mukàji to, kàdi cyà Mfùmù wa mu Dyulu udi udileeja Yèyè mwinè, bu mùdi èkèleeziyà mulwè pabwìpì menemene mu banyàabanyà, mùdi mudimu wà bwambi ewu ne cyà kwikala mudimu wà bwambi wà mùshindù wùmweùmwè wùvwa Ye naawù awu.

¹⁰⁰ Aba bàakafwà mu cikondo cyà Luther, kwìnshi kwà cipaapu cyà musàkà aci, bu nànkù; kì ndilongesha dyà cipaapu cyà musàkà to, kàdi ànu bu cileejilu.

¹⁰¹ Cipaapu cyà musàkà aci nciàmbe kupwàngana, umwe wa kunùdi ní ùkaadikù mukùye. Kwènà mwà kupicishamù kapaaya to, mbikolè. Ka—kàbàvwa ne bitoci munkaci amu to, ku dyètù dimanya. Lwibàku lwàci lùvwa lulenga menemene! Mpindyewu, mbajimije dibwe dyà mùsongà. Kì mbamanyè ne didi penyì to. Mpindyewu pàdi dibwe dyà mùsongà adi dyàlukila, nediiikalè ànu bu makwàbò ónsò, nedibwelakanè ne dibwe didi dishààle dikàngùle mukana adi. Bu nwènù bafwàne kutentekapù dibwe dyà mùsongà, ndifwànyine kwikala mùshindù awu.

¹⁰² Nènku pàalukilà Yesù, Yèyè neàsanganè Èkèleeziyà udi musukula, kàyì katobà anyì mufudì to, ne neciiikalè mudimu wà bwambi wùmweùmwè wùvwa Ye naawù awu. Newàlujè Dibwe dyà mùsongà adi.

¹⁰³ Ànu bu mùdi cyanza cyànyì eci, mu mundidimbì. Mmundidimbì, cikòlā ùtamba kutwila pàdi cyanza cyànyì cyènda cishààla. . . Ncibùlòji *mwab'ewu*, cintu cilelèlā *apa*. Pàdi cibùlòji ne cilelèlā, cidi cyènda citàmbe kushitákana; citàmbe kufiika, citàmbe kufiika, citàmbe kufiika, ki ndekeelu wa byònsò kulamakanaci pàmwè, ne ciibùlòji ne cilelèlā kushàalaci cimwè.

¹⁰⁴ Apu mpàdi Èkèleeziyà ne Kìlistò bàdisanga pàmwè, bu Mukàji-musèla, ne Nyumà umweumwe uvwa munda Mwèndè awu neikalè pambidi Pèndè; pàdi Èkèleeziyà awu ùfuma ku dibingishiibwa, dijidiibwa, dibàtiiza dyà Nyumà Mwímpè, ùbwela mu matùkù à ndekeelu, ne kumusonga mpindyewu bwà Dilwa dyà Mukalenge.

105 Kaa, kwikadi citùpà cyàDì cyà cipapa to, wêwè mwanèètù mwena Mpenta. Kenka ne Dìyi ne itàbuuja citùpà cyàDì cyònsò. Kùkabwedìku mu tusùmbù etu ne bikwàbò to, bu mutùdì tumòna byènzeka leelù ewu emu. Kùkèmikù bwà aci to, bwalu Dibwe dyà mùsongà dilwalwa, dyèla lubilà ne: “Abbà, Taatù,” àbidì àdì panshi aa, “Nzambì Wanyì! Nzambì Wanyì!” Èyowà, ndi ngìtabuuja nàнку ne mwoyi wànyì wònsò.

106 Nudi nucimòna anyi? Nudi bamanyè cìndì muswè kwamba aci anyi? N’Kilistò mpindyewu munkaci mwà kwangata bikùsùkusu byà makèèlèlà abi, ba-Luthériens, ba-Méthodistes, ba-Presbytériens, ne bikwàbò, ne Yèyè ùdi munkaci mwà kubitéeka mu nshintùlùkìlù. Nshintùlùkìlù wa mùshindù kaayi awu? Nshintùlùkìlù wa Nyumà Mwímpè; cìvwàbo naaci aci, kusàkidilakù; ùcyènza too ne pàdiYe ùtèèkapù cimfwànyì Cyèndè Sungasunga, pàdi Èkèleeziyà ne Kilistò bàlwa cintu cimwè mu didisanga. Nzambì, enzàku nàнку! Ndi mutwìshìbwe ne nudi nucimòna. Nwènu bacimòne cyà bushùwà . . .

107 Cìdi cìmvùlwija bwalu-bulonda kampànda, bwà pàvwà ditàbuluja dinène dyà—dyà ba-Gallois adi munkaci mwà kwenzeka. Bantu banène kampànda bàà mu ditùnga emu kwelabò meeji ne bàvwa mwà kuya kuntwaku bwà kumòna ditàbuluja dyà ba-Gallois adi, cìvwà mwà kwikala munkaci mwà kwenzeka. Nèнку pààkayàbo kuntwaku, bwà kujandula, bwà kamòna nzùbu mùvwadi dyènzekela. Pààkafikàbo ku Galles, bààkanyùnguluka myaba yònsò, kubangabò kukonka mwaba wùvwà nzùbu awu ùsanganyiibwa. Bààkamòna mpùlushi mukèsè wa musàngeeleu mwimàne mu disangu, ne kafulu kèndè kakesè kàà bumpùlushi aku ku mutù, ne ùvwa munkaci mwà kukùpa bòyo bwèndè eku ne eku mùshindù awu. Ki bantu abu kulwabò tàmakàtàmakà too ne kùdiye, kwambabo ne: “Mukalenge, udiku mufwànyìne kutwàmbila mu nzùbu mùdì ditabuluja dyà ba-Gallois dyènzekela anyi?”

108 Yèyè ne: “Èyowà’s, mukalenge, s’ke cìndì mèmè ewu! Mèmè ke nzùbu awu!” Bwà cinyi? Ùvwa wèla mbilà mikolè yà disànka ne Bukènkè bwà ditàbuluja dyà ba-Gallois—dyà ba-Gallois munda mwèndè.

109 Ke mùvwà kàbidì èkèleeziyà wa Mpenta ne cyà kwikala leelù ewu, ùkonka ne: “Yesù Kilistò, umweumwe awu makèèlèlà, leelù, too ne kashidi awu ùdi nganyi?” Bukènkè Bwèndè bwà Èvànjeeliyò Wèndè bùvwa ne cyà kwikala bùkenkesha ne Dìyi dyà cikondo eci, bùbuulwila ditùnga Yesù Kilistò, ànu mwàkadibi musangu awu amu.

110 Ùvwa mutàmbe kuula tètè ne ditàbuluja dyà ba-Gallois mu mùshindù wà ne yèyè nguvwa ditàbuluja dyà ba-Gallois adi mene.

111 Bìvwa bikèngela bwà twètù kwikala buujìbwe tètè ne Kilistò mu mùshindù wà ne tu—tuMuleeja mu bukolè bwà

Dìyì Dyèndè dìdì ditùkosela bwà ditùkù edì adi. Bânà bèètù, kanwìnaminyi mu bintu byà pa buloba nànsha, kanùteeci to, ntàtù eyi yìdì yìnùlalula. Shààlaayi ne Èvànjeeliyò. Tàngilàayi Dìyì dyònsò! Kanwàlukidi ku cidì taatù kampànda mwambè to. Tùyaayaaku mpindyewu mene ku cyàkambà Yesù ne cìvwa ne cyà kwenzeka mu ditùkù edì aci. Èyowa's, mukalenge. Twètù tudi ne cyà kwikala Bukènkè bwà cikondo eci, munkaci mwà kumwenesha Èvànjeeliyò patòòke. Luther ùvwa bukènkè bwèndè. Wesley ne bwèndè bukènkè, Mpenta ùvwa mbukènkè bwèndè. Kàdi, tukàadi bayè kule menemene mu njila mpindyewu, tudi tubwela mu Mukàji-musèla, babiikidiibwe bwà kupàtuka, Basungula abu. Vùlukàayi ne, nwènù biikàle nànkù, nudi ànu bu mpùlushì awu, yèyè ùvwa nààDì munda mwèndè.

¹¹² Vùlukàayi ne, eci ncikondo cyà mwandamutekète cyà èkèleeziyà, Cìkondo cyà Èkèleeziyà wa Laòdikiyà. Bilondèshile Bwàkabuulwibwà 3, bàdi bàbènga Kilistò. Bwà cikondo cyònsò cyà èkèleeziyà cyàkatèèdiibwa mu Bible, Cìkondo cyà Laòdikiyà ke cìvwa citàmbe bubì ku byònsò abi. CyàkaMwipata, kuMubènga, kuMwelaci pambèlù.

¹¹³ Nuvwa bamòne ngondo mukwàte mifitù, dilòòlò adi, kumpàla kwà paapà kuyayè ku Loomò, kuumukila ku Loomò kuya ku Yelusàlemà anyi? Yelusàlemà, èkèleeziyà wa kale ne kalèèlè awu; ngondo ùdi cìfwànyikijilu cyà èkèleeziyà, mwikàle misangu yònsò ànu ùleeja bukènkè bwà dìbà, pàdì dìbà kadiyipù to, kàdi yèyè kufiikishiibwa fitùtù. Mvwa mucizòle ku cibàsa cyà kufundila eku, kùkaadi bidimu bisàtù anyi binaayi, ne kuleeja maèkèleeziyà, mu nkàmà ne binunu byà mèkù mu ditùnga dijimà emu. Cìvwa ncinyi? Mundidimbì kampànda. Musangu wà nzànzànzà wùkaadiku paapà muumùke, mubwelè mu—mu dìnà dyà Pòlò, ne bikwàbò, mupicile mu myaba ayi; ùvwa ne cyà kubènèsha musùlù, bwà kuwùsabuka, ne bikwàbò. Ncinyi cidì cyènza ne—musùlù ùjingè dibènèsha?

¹¹⁴ Mbwalu kaayi ebu ne cikondo cyà èkèleeziyà citùdimu ne mwoyi leelù ewu eci? Kanwènakù mwà kucimòna anyi? Nzambi munkaci mwà kucyàmbila mu maulu, ùcyàmbila mu Dìyì Dyèndè, ùcyàmbila pa cibèjibeji, ùcyàmbila munkaci mwà bantu? Kanwènakù mwà kukàngula mèsù ènù bwà kumòna dìbà anyi? Ebi ke bidì bìjaadika Bulelèlà. Eci ke Bukènkè bwà dìbà edì.

¹¹⁵ Tàngilàayi nkwaka munène wa bukwàntèndeleele awu, munkaci mwà kubwela mu nsangilu ewu mpindyewu, ànu munkaci mwà kwenza cimfwànyì cyà nyama wa lwonji, mu Bwàkabuulwibwà 17, ànu menemene cyàkambàci ne cìvwa mwà kwenzeka aci. Nwènù beena Mpenta nenùshaalè basòmbe bapùwe vivivi bwà cyòci aci ne kukabwelamù anyi? Dìbà dyà kwenzèjàngana maalu ku makànda dyàkumbanyi.

116 Mpindyewu ke dîbà dyà kujuukila kùùlu ne kulongolola mwéndù wèbè, ne kukenka ne Èvànjeeliyò wa Yesù Kilstò ne Bukolè.

117 Ndi mumanyè ne eci kí ncyà bantu bônso to, pàdi balundà bàànyì bààbúngì bàà beena Mpenta bàsòmba pàmwè ne paapà ne bikwàbò, ne bàmba ne: “Njiyà yà mu nyumà menemene.” Bwànyì mèmè, cidi—cidi cibi. Cidi cibèngangana ne Bible. Dìyi dyà Nzambi diikalè Bulelèlè. Èyowà’s, mukalenge. Dîbà dyàkànyì mpindyewu. Tudi tumòna nkwaka minène eyi yitúngunuka yìkabwela mu . . .Kaa, bìdi bimwèka ànu bímpè bwà mèsù à mubidi, cyà bushùwà.

118 Kaayifà, cyàkabuulwilàye baakwidi aci cyàkamweka címpè, mu ditùkù adi, ditùkù dijimà adi. Kàdi Yesù nguvwa Bukênkè bùvwà bwènza ne Dìyi diikale ne mwoyi, kàdi nsangilu yàbò ne bikwàbò byàkafofomija mèsù àbò ku Dyòdi. Yèyè ne: “Bàlekèlaayi; bampofò balombola bampofò, nebàdìshindè bônso mu mùkidi.”

119 Tudi baalùkile cyàkàbidi ku dîbà adi, bàna bèètù bàà balùmè ne bàà bakàji. Tudi baalùkile cyàkàbidi ku dîbà adi. Mònaayi. Bwà cinyi? Kiiipàcilà kàmwèkàmwè aku.

120 Tudi tusangana ne—makênkè manène aa atùvwàmu ne mwoyi, mu matùkù àkaadi mapite aa, àvwà ànu mímpè, katwèna naabi cilumbù to. Kàdi, Cikondo cyà Èkèleeziyà wa Laòdikiyà eci, nwadimuka, nwavùluka ne, n’Kilstò mubèngiibwe. Nènku ki cyòci aci menemene mpindyewu.

121 Nsangilu munène ewu ùkaadi munyunguluke, bwà kusangisha beena Mishònyì bônso pàmwè, nkwaka wa bukwántèndeleeleu ewu. Nènku cidi munkaci mwà kwenza cinyi? Cidi cyèla mifitù pa Dìyi mene, cyòci ciinè, Dìyi pààdi n’Kilstò. Mmunyi mùdìbo mwà kwenza? Pàdibi ne, Science Chrétienne, ne Bàna bèètù Basanga, ne bààbúngì bàà ku bantu bàdi mu malongolodi awu abu, bàmwè bàdi biitabuujà dilediibwa dyà kùdi virgò, bakwàbò kabèena biitabuujà to, bàmwè bàdi biitabuujà *cikampànda* ne *cikansanga*. Mmunyi mùdikù mwà kudiswika ne bupidyà? “Mmunyi mùdi bàbidi mwà kwendela pàmwè pùikalàbo kabàyi bapunge dìyi?” Pàtukàayi munkaci mwàbò ne ikàlaayi batàpùlùke, ne angàtaayi Dìyi dyà Cijila dyà Nzambi ne shààdilàayi ku Dyòdi.

122 Yesù Kilstò mmwenzèjiiibwe bwà kumwènesha Dìyi Dyèndè. Cintu cidi citùkèngelà leelù ewu ndijuuka dyà Maalàki 4. Mupròfètà mukwàbò neajuukè mu Dìna dyà Mukalenge Yesù Kilstò, ne neàpatulè ànu menemene cyàkalayàYe bwà kwenza aci. Pashiishe, muntu mu bufofo neapwe mwoyi Cintu aci ne kubwelayè mu mídima, ànu mùtùbo benzèna misangu yònsò.

123 Tàngilàayi mpindyewu, tudi tujandula ne, kiipàcilà kàmwèkàmwè aku, kàdi leelù ewu, kàdìbo bàbèngela, maèkèleeziyà àdi àbènga Mukenji, èla Dìyi ku nkùrusè, èla

Diyi pambèlu. Mpindyewu wêwè kùyì wa ku cyôci to, kwênà nànsha mwà—kwênà nànsha mwà kwikala ne webè èkèleeziyà awu to. Nebàmütwè bikùvu. Bikèngela ùbwelèmu. Wêwè kùyì mwenze nànkú to, bàdi bàkutwà bikùvu. Kàdi udi wamba bishi bwà bwalu abu? Kaa, twàyì Cyôci cidi cyà bushùwà aci nyama ku mikòlò! Vùlukàayi ne, ncikondo cyà dipoopediibwa dyà pa nkùrusè cyàkàbìdì, pàmwè ne cyôci aci.

¹²⁴ Bukènkè bwà mashimi bwàkalela bwìvì butàmbe bunène—butàmbe bunène butù kacya bàà pa buloba bapetè, mu Angletterre, àbìdì mashàale aa. Bwìvì butàmbe bunène butù kacya bwenjìbwe, bùvwa wenza kùdì bukènkè bwà mafi. Bwìvì bwà miliyò mwandamutekète yà ndola bwàkènjìbwa kùdì bukènkè bwà mafi bwàkatekesheshà lùbilu lwà kàwulù aku, ne Scotland Yards kàakakùmbanakù mwà kupeta muntu awu to. Bàakanyeema naayi, mu budimù bwà kacya. Aci ciwva cimanyike bu bwìvì butàmbe bunène butù kacya bwenza kùdì bìvì, mu bufùki emu. Cìwva cìbà buloba, ne bwìvì bwà butàmbe bunène.

¹²⁵ Nè bwìvì butàmbe bunène butù kacya bwenzela èkèleeziyà wa Yesù Kilistò, mbwenza kùdì bukènkè bwà mafi, bukènkè butòndòke bwà cikondo cikwàbò kampànda, kàdi bàbènga Bukènkè bùkaavwa budyànjila kwamba bwà eci cikondo. Amen. Bukènkè bwà mashimi, bukènkè butòndòke bwà makèèlèlè's! Kanwèndèdì mu bukènkè butòndòke bwà makèèlèlè to. Endèlaayi mu luuyà lwà Mwànà leelù ewu. Kanùdìpwekèshidì rido yà cyena màngumba to, nwamba ne: “Matùkù à bishimà àkaadi mamanè kupita.”

¹²⁶ Yesù wàkamba ne: “Bimanyinu ebi nebìfilè aba bàdi bìitabuuja: mu Dìnà Dyànyi nebìipate badémòns, nebààkulè mu myakulu mipyamipyà. Bimanyinu ebi nebìbàfilè.”

¹²⁷ Bòbò bàdi bàmbe ne: “Bìdi ànu bìmpè bwà bàpostòlò; kì mbwètù twètù to.” Aci's mbukènkè butòndòke.

¹²⁸ Yesù wàkamba ne: “Bimanyinu ebi nebìfilè aba bàdi bìitabuuja, mu buloba bujimà.” Èyowà's, mukalenge.

¹²⁹ Mpindyewu bwalu bùdì cinyi's? Bèndela mu bukènkè butòndòke, ke cyàkalelè bwìvì butàmbe bunène, ncyumùshe Kilistò mu èkèleeziyà. Nwamònu's, mmunyi mùdì Kilistò mwà kuDimwènesha mu Diyì didì dilayiibwe leelù ewu, ku twitabàayi kampànda yà mashika yà makèèlèlè ayi? Kacyèna cìfila luuyà kùdì Dimiinu to. To, mukalenge. Bwìvì butàmbe bunène bwà èkèleeziyà!

¹³⁰ Luuyà? Kàdi, vùlukàayi ne, bukènkè bwà twitabàayi yà mashika abu kabwàkubobeshakù Dimiinu dyà leelù ewu nànsha. Bùdì bùvila Dimiinu. Ndciciima didì pa buloba, mmifitù yà mupimbu. Dìbà dyàkànyi dyà Nzambi kujuukaYè ne kuteemesha cyàkàbìdì Bukènkè, kuvwija Diyì Dyèndè ne

mwoyi. Cyà bushùwà, Bukênkè's! Twitabàayi yà mashika ayi kayàkubobesha Lutete nànsha. Nànsha byà kumòna lufù.

Kàdi, vùlukàayi ne, dishidimuka ndyènzèle lwendu pàmwè ne dîbà.

¹³¹ Ànu bu mûmvwà munwambile ku cibangidilu, ndi ne cyà kutàngila mifwanù, mùshindù ùdì bufùki bwènda. Ncyèna ne dilonga dyà kàlaasà bwà kucyènza to; ncyèna naadi bwalu to. Mbipicìibwe ne mèmè mwikàle ne cìndì naaci aci, kutàmba ne dilonga dyònsò dyà kàlaasà pa buloba. Ndi ne Yesù Kilistò. Ndi mMumòna ùteeka Dìyi Dyèndè mu cyenzi too ne ku ndekeelu, nènku's ke cyònsò cìdì cìnkèngela bwà kumanya ncyòci aci.

¹³² Ne muntu yèyè mulediibwe kùdì Nyumà wa Nzambi, yèyè neàkenketè Mifundu bwà kumòna ní kaYèna dyandamuna bwà leelù ewu. Dyandamuna dyà ditùkù dìdì Kilistò. Kilistò ùdì Dìyi. Pàdì Dìyi dilwa ku mwoyi, dìdì dileeja Bukênkè bùdì bulayìibwe bwà leelù ewu abu. Mu Cikondo cyà mifitù cyà Laòdikiyà eci, ànu ndambù mukesè cyanàànà wa ne: “Bònsò bándì ngàakidila abu, ndi mbànyooka, ndi mbàtànisha. Nyingalàlaayi,” Yesù wàkamba ne: “ne alùkilaayi.” Alùkilaayi ku Dìyi. Yèyè ùdì Dìyi. Lwàyì kùdìYe. Èyowà's, mukalenge.

¹³³ Tàngilàayi Bukênkè. Bwàkafùmina ku Esètè, butàngile ku wesètè. Tukàadi ku Côte Ouest. Bùvwa ne bitùpà bisàtù, kí mmwómò anyi? Bùvwa ne bitùpà bisàtù. Bwàkasabuka màyi, misangu yisàtù. Kuumukila ku Pòlò, ne kusabuka mbù wa Méditerranée, kubwela mu Allemagne, Allemagne kàdi kuteema ne Luther; kukòsolola Mùkidì wà Angleterre, kuya kabwela mu États-Unis ne mpindyewu. . . kubwela mu—mu Angleterre; pashiishe, Angleterre, kupicilaBù pa mbù wa Pacifique, butàngile ku États-Unis. Nènku bwàkapanda njila wabò kuumukila ku mukenji wà Luther, butungùnùke ne ku ndekeelu, too ne mwàkenzàbi ne citùpà cyàBù cyà ndekeelu cìdì cyàkàbìdì apa ku Côte Ouest.

¹³⁴ Ne kuumukila ku diboba dyà lutete, kuumukila kwònsò aku kacya ku Luther, njila mujimà awu kupicila mu cikondo, bìvwa bikèngela kwikalaci kaabujimà kàà Èvànjeeliyò mpindyewu, Bukolè bwà Nzambi bwà kubobesha. Bukênkè bùdì buleejiibwe mu dibingishiibwa, dijidiibwa, cikondo cyà beena mpenta abu, bìvwa bikèngela kubobeshabù Muci-Mukàjì-musèla bwà Dilwa dyà Mukalenge Yesù Kilistò; bwà Kilistò wàmòna mwà kumwèneshiibwa mu Èkèleeziyà Wendè, bu Mupersonà umwèpelè, Yèyè ne Mukàj'Èndè, Yèyè ne Mukàj'Èndè-musèla. Amen. Ke dîbà ditùdì ne mwoyi edi's. Eci's ke Bukênkè bwà ditùkù. EndèlaayiMù's! “Ikàlaayi basungidiibwe, nwènù ntengu yònsò yà buloba.”

¹³⁵ Bukênkè butòndòke bwà Èkèleeziyà wa ditùkù edi bùvwa butàmba kùseeswishangana bikolè, ke mùdì Yesù mmwambè mu Maatàayi 24. Wàkamba ne: “Mbifwànyine kuseeswisha

basungula mene bu ne bivwa mwà kwenzeka.” Nwamònu’s, kí nnè Luther kàvwakù mwà kwakidila. . . Luther kàvwakù mwà kuseeswisha Méthodiste to. Méthodiste kàvwa mwà kuseeswisha mwena Mpenta to. Ncyà bushùwà, nwamònu’s, kàdi bishi bwà Mukajì-musèla? Ke cidi cijoomona beena Mpenta mèsu ncyòci aci. Èyowà’s. Nwamònu’s, nudi baalùkile ku twitabàayi wenù, ku mmwènekèlu wenù, badìvwijè bulongolodi, ne bapetè musùmbà wà bantu bànwàmbila cyà dyenza.

¹³⁶ Bible ngudi ulaya bintu ebi. Bìdi bìtùkèngela balùme ne bakàji bàdi buujìibwe tètè ne Nyumà wa Nzambi.

¹³⁷ Wèwè wamba ne udi ne Nyumà wa Nzambi munda mwèbè, ne Nzambi wènta mulayi kampànda munda Emu, mmunyi mùdi Nyumà Mwimpè awu mwà kuCìitaba, wamba ne: “Èè, bivwa bifwànyine kwikala bìmpè bwà cikondo cikwàbò. Katwèna tuCìitabuuja mùshindù awu to”? Awu kí n’Nyumà Mwimpè to.

¹³⁸ Muntu udi mùle tètè ne Nzambi awu, yèyè ne Díyi bàdi umwe. Cyà bushùwà menemene, mmwòmò. Ncipeta cyà ku didìsanga, didìsanga pankaci pàà Nzambi ne bantu.

¹³⁹ Mmunyi mùdi muntu wetù mukàji ewu, wíkala mulùme wa muntu mulùme kampànda, bìbèngangana, wenza bintu bìdiye kàyi muswè bwà yèyè mukàji awu kwenzayè? Mmunyi mutùdiku mwà kunàya ne bàà pa buloba, ne màngumba ne malongolodi, kàdi kubènga Bukènkè bwà dībà edi? Bidi mwà kwenzeka munyi’s, mwanèètù wa balùme ne mwanèètù wa bakàji? Ne dinanga dyà Nzambi ne kaneemu bwà muntu ne muntu wa kunùdi, mmunyi mutùdi mwà kwitaba bintu ebi? Mmunyi mutùdi mwà kucitèèleja? Cìdi cìtwàlukidila cyàkàbìdi.

¹⁴⁰ Kwikadi wapiisha ba-Luthériens to; bwalu, bòbò bààkapiisha beena Kàtòlikè. Kupiishi Wesley to; bwalu, yèyè wàkapiisha ba-Luthériens. Nwamònu’s, mùshindù, paùdi upiisha Cintu cidi munkaci mwà kwenzeka leelù ewu ne uCìkoma nyimà; paùdi umòna èkèleeziyà yènù yìbwela mu nkwaka munène wa bukwàntèndeleele awu, ne bikwàbò byà mùshindù awu, wènda ùnùlombola, muntu ne muntu, nubwela mu cimanyinu cyà nyama wa lwonji, ne nwènù nudi naaci. Bantu bààbùngì bàà meeji matòoke bàbwelamù buludì.

Wèwè udi wamba ne: “Mbantu bìmpè, bantu bàà cijila.”

¹⁴¹ Ki mùvwà kàbìdi baakwidi abu. Byòbì bikèngela bwà mémè kwangata cijila cyà Yesù Kilstò, anyi mamuma à Nyumà, bààbùngì bàà kunùdi mbeyèmène cyòci eci. . . Mpindyewu, kí nkucìdyombola to. Mémè ndi ngiitabuuja Díyi ne Díyi dyònsò dyàci.

¹⁴² Bààbùngì nebàmbè ne: “Kaa, mémè’s ndi mwakùle mu myakulu. Ndi naaDi.” Adi kí n’Dyòdi to. To, mukalenge.

Bààbùngì bàà kùdìbo bàdi bàmba ne: “Mamuma à Nyumà, ki Yèyè awu.” Mmwòmò anyi?

143 Twānji tuteekàayi Yesù ku cilumbù (Nzambì, mfwilèku luse) bwà katanci kakesè. Tūnujùlè kuulu, ne mèmè nēngìikalè mwakwidi. Nennwambilè ne: “Nsongààlùmè ewu, mmubwélè mu cimenga emu, bāmubiikila ne Yesù wa mu Nazàlèètà. KanùMutèeleji to. Tudi twitabuuja mamuma à Nyumà. Mpindyewu tàngilàayi apa, s’mmwakwidi wenù wa kale wa kalolo awu. Yèyè, kakwèndè mulùme, tatwèndè wa kakwèndè mulùme, bōnsò bàvwa baakwidi. Wàkalàmbula milàmbù, ne bwèndè bwànà bwōnsò. Kushààlayè ànu mu sèminèrè amu. Kutàngilayè, kwitabuujayè, yèyè—yèyè wàkenza byōnsò bìvwàbo bamulongèshe abi. Yèyè mmumanyè Mifundu, kuumukila ku A too ne ku Z. Yèyè mene ùdi ùYifùnda, yèyè mwine. Ùfùnda Mifundu, yèyè mwine, ke citu bafùndi bènza’s. Kàdi’s ki yèyè ewu, muntu munène! S’nudi bamanyè ne ki cidiye.

144 “Cyàkenzekà ncinyi pàvwà mamwèbè ukulela? Nganyi wàkiimana ku luseke lwà kalààlù kèèbè aku’s? Nsaserdòsè wa kale wa kalolo awu. Pàvwà maamù ne papa bàkeba kutàpuluka apu, wakabèèla bōnsò mabòkò ne kubàlombola cyàkàbidì kùdi Nzambì nganyi’s? Mmwakwidi wa kale wa kalolo awu. Èyowà.

145 “Nènkù apa Yèhowàh ùdi ùlòmba mwànà wa mùkòòkò bwà mulàmbù, bwà mpèkaatù. Beena kantu-ku-byanza, bàdi bàsòmba mu bimenga emu ne bàdi—bàdi bàsùmbisha bintu byàbò, ne—ne bikwàbò, bintu byàbò ne byà pa madimi, ne cyōnsò ciikalàbo mwà kupànyisha aci. Kabèèna bamuna bânà bàà mìkòòkò to. Kàdi baakwidi abu bààkenza cinyi? Bàkenza kaacitanda kakesè kuntwaku, bwà bòbò kusùmbisha bânà bàà mìkòòkò, nànkù pàdi muntu mwà kubwela, kukezula musùùkà wèndè ne Yèhowàh.

146 “Muntu ewu, Yesù wa mu Nazàlèètà ewu, wàkenza cinyi? Yèyè mmufùmine ku èkèleeziyà kaayi’s? Ngwa mu dingumba kaayi Yèyè mwinè’s? Nkartà kàà buumambalà kaayi kiinè aku’s? NetùMwipàtè. Katwàkwikala ne cintu nànsha cimwè cyà dyenza Nendè to, bwalu Yèyè udi ùpiisha muntu ne muntu wa kutùdi. CyàkenzàYe ncinyi? Ùdi ùya kuntu kwàka ne wàngata cyòci aci, mwaba ùdi bantu bàteeta kufikisha misùùkà yàbò ku disùngidiibwayi awu, èkèleeziyà,” mutùdi bafwànyine kuciinyika leelù ewu, nwènú beena meeji à nyumà abu ne: “Yèyè kutònkola mèèsà, kwipatayè bashintudi bàà mfrangà; kwangatayè nshinga kuyiluka cipya, kàdi kubèèla lubilu pambèlù; ne kubiikilayè nsaserdòsè webè wa kale wa difwànà dyà Nzambì awu ne: ‘mwànà wa dyabùlù,’ mukulàkàji wa kalolo awu ùvwa mukusombèshe mfrangà pàvwà mu lutàtu apu awu.

147 “Nganyi wìmana ku luseke lwèbè ne kukujiika pawikalà mufwè? Nsaserdòsè wa kale wa kalolo awu. Yèyè ùdi ne mamuma à Nyumà. Kàdi Yesù wenù wa mu Nazàlèètà ewu ùdi ne mamuma à Nyumà anyi?”

148 Kwèna mwà kulumbulwishila ku dyakula dyà mu myakulu to, anyi kwèna mwà kulumbulwishila ku mamuma à Nyumà to. Kàdi ndimwèneshiibwa dyà Dìyì dyà Nzambi, difiikishiibwe ku Bukènkè. M'Bukènkè bùdì bùcyènza.

Muntu udi wendela mu Bukènkè abu awu's! Yesù Kilistò kààkashindameena pa dyakula dyà mu myakulu to, nànsha mwàkacyènzaYe amu. Yèyè kàvwa mamuma à Nyumà to, nànsha mwàkadìYe amu. Wèwè kùvwa mufwànyine kucilumbulwisha to. Kàdi Yèyè wàkiitabuuja ne kuDitwa amen, ne Nzambi wàkatèeka mu cyenzi Dìyì dyònsò dyà mulayi wà ditùkù adi munda Mwèndè. Ki Bukènkè bwà dîbà mbwòbò abu. Ki cileeeji ncyôci aci.

149 Pàdì muntu ùngambila ne Nyumà Mwîmpè udi umata munda mwèndè kàdi ùvila Dìyì dyà Nzambi ne kadyèna nànkù to, kùdi cintu cipampàlámùke mu cyôci amu. Kùdi cintu kampànda cipampàlámùke mu maasèminèrè ètù, ne bikwàbò, mpàdìbò bàlongesha bantu tèòlòjì yònsò wa bongò busalùke ewu ne bikwàbò bintàkanyì byà leelù ewu ebi's. Bantu bàdì bafwànyine kwenza cintu cìmwècimwè aci cibèngàngàne ne Dìyì dyà Nzambi, ne kubàlombola buludì mu cishipeelu cyà bukwàntèndeleele kuntwaku, mòna's, cyà bushùwà, s'mbibi.

150 Ndi ngamba nànkù mu Dîna dyà Mukalenge! Nutàngilaayi bwà numòne ní kí nCilelèlà, Bukènkè, Bukènkè bwà dîbà edi!

151 Twitabàayi yà mashika ayi kayààkutwàlakù dinowa nànsha. Bikèngela twikalè ne Èkèleeziyà udi musukùdiibwe mu Mashì à Mwànà wa mùkòòkò, ne muvwijìibwe umwe ne Dìyì, mwikalè Èkèleeziyà.

152 Makènkè matòndòke à èkèleeziyà wa ditùkù edi awu, Yesù wàkamba ne, àdi àtàmba kùseeswishangana bikolè, "pàmwè nè Basungula bu ne bivwa mwà kwenzeka." Ànu Basungula nkààyabò! "Kàdi ànu mwàkadìbi mu matùkù à Noà, pààkasùngidiibwà misùùkà mwandamukùlù, ki mwikalàbi kàbìdì mu Dilwa dyà Mwànà wa muntu." Bakesè, menemene, mbààsùngidiibwà pa dîbà adi.

153 Cidi cyènza cinyi? Cidi cifila buludì ku cishipeelu. Tudi tusangana cyôci aci mu mîdimà yà mpindyewu mutùdì ne mwoyi emu. Nkàadi njikija, mu kwamba kwà eci nùnkù. Mu mîdimà yà mpindyewu yitùdì ne mwoyi eyi, matùkù atùdì ne mwoyi mpindyewu aa, pàdì Bukènkè bùjìma mu maulu apa, Mbujime munkaci mwètù emu, kumpàla, bwà kutùleeja; bileejìibwe kùdi Bible, pa Bitampì Mwandamutekète, bivwà munkaci mwà kwenzeka abi. Kàdi apa Nzambi ùdi ùcileea ànu mu dyulu mene, ùpweka ne ùcyàmba patòoke pa buloba. Kàdi maèkèleeziyà àdi àkabwelamù shikùshikù!

154 Wasùngila Mukàjì-musèla mukèsè udi ulama Dìyì awu dîbà adi nganyi? CyàMwenzekelà ncinyì dîbà diipacibwàYè mu mashika, pàà Nkààyèndè? Kààkwikala ne mashika to, Dìyì

dishindika dyà mulayi mu ditùkù edi. Kaa, èyowà's. Cidi bu mùdì . . .

¹⁵⁵ Cidi cibazula, ndi mumanyè nànkù, kùdì bantu, bwà kumòna ànu èkèleeziyà wàmba ànu ne: “Èè, ncyénzè menemene ànu bu cintu cyà mwomùmwè aci.” Yesù wàkamba ne bìvwa ne cyà kwikala mùshindù awu. Mbifwànyìne kwikala, mu mùshindù wa ne: “Mbifwànyìne kuseeswisha ne Basungula mene bu ne bìvwa mwà kwenzeka.” Kaa, èyowà's. Èyowà's, mukalenge.

¹⁵⁶ Bidi bimvùlwija ànu muntu kampànda mu Floride, àbìdì àdì panshì aa. Ùvwa wàkula, wàmba ne ùvwa ne kàshinyì kàà Chevrolet kàvwà kamufwile mu Floride, ne kwambayè ne wàkaya naakù ku nzùbu wa dilongolwela màshinyì. Nènku mulongolodi wa màshinyì ewu wàkaya kuntwaku, ne wàtatèeka bintu byònsò pàmwè, kàdì kàvwa ànu mwà kukàteemesha to. Wàkeelamù bintu byònsò, bìvwa bikèngediibwa. Yèyè wàkeelulula bintu byònsò bipyabìpyà ebi, kàdì, nànsha nànkù, kakàvwa ànu kafwànyìne kuteema to. Kàvwa ànu mwà kukàfikisha ku diteema to. Wàkatùngunuka ànu ne kuteeta. Ke mulongolodi mukèsè wa màshinyì awu kubindulukayè, wènda ùnyùnguluka, nzùbu awu mujimà, wàngula eci ne mbibì.

¹⁵⁷ Kàdì muntu uvwa mwimàne mwaba awu, wàmba ne: “Ndi mwindìle kàshinyì kàànyì, mukalenge. Nkààdì mujìmìje díbà. Kwènà mwà kukàlongolola anyì?”

¹⁵⁸ Yèyè ne: “Ndi ngènzà cyònsò cìndì pàànyì mwà kwenza aci,” mubìndùlùke bikolè ne mwikàla wàlenga eci wàlenga eci. Ki kwasayè lwendu.

¹⁵⁹ Ke dyàkàmwè nsongààlùmè kampànda mùkàlàngà mulwàte bìmpè kujuukayè ne kumutàngilayè katanci kakesè, ke kwambilayè mulongolodi wa màshinyì awu ne: paanyimà pàà yèyè mwànji kumulekela ùsaamisha mutù wèndè bwà katanci kakesè, ki kwambayè ne: “Bwà cinyì kùyìkù ànu ulenga eci? Kwèna upeta nzembu nànsha mikesè to.”

¹⁶⁰ Ki yèyè ne: “Kacya ncìvwakù mwanji kwela meeji ku bwalu abu to.” Nànkù ke kunyùngulujayè kaacintu kakesè aku, nì nkanganyì kàvwà mwaba awu, ki yèyè kubwejayè—nzembu munda amu, kàshinyì kuteemakù.

¹⁶¹ Kukùdimukayè e kwamba ne: “Wèwè udi nganyì?” Nudi bamanyè ne ùvwa nganyì anyì? Maanyimèèlà munène wa mu—wa mu General Motor. Yèyè ke uvwa mwenze cintu aci. Yèyè nguvwa mukàfùmbe.

¹⁶² Mu díbà edi, mwanèètù, patùdì tudikonka ne mbwalu kaayi ebu ne ditàbuluja dyètù, mbwalu kaayi ebu's? Tudi ne cyamù cyà mudimu ne bikwàbò byònsò, tudi ne byamù bilamakaja, kàdì Bukolè bwendeshi bùdì penyì? Ke cìdì cìtùkèngelà, bwà kubweja Yesù Kìlistò mu cyalu. Mbwalu kaayi ebu's? Ndi nzwàmbila ne, kùdì Kampànda kaaba aka leelù ewu, àlèluuyàh, ùbìikidiibwa

ne Nyumà Mwîmpè, udi mwà kulenga Bukolè bwendeshi. Yêyè ki Bukolè bwendeshi bwà byamù bilamakaja.

¹⁶³ Tudi biimàne leelù ewu, twètù beena Mpenta, umwe wa ku èkèleeziyà yà mitàmbe bunène mu ditùnga, binunu misangu binunu mbisàkidiibwe ku cidimu cyònsò, kàdi Nyumà Mwîmpè awu wèpi? Tudi tucìitaba, mu dyakula dyà mu myakulu, ne tudi bamòne mùdibi byènzeka. Ba-Méthodistes bàdi bàcìitaba, ku dyela dyà mbilà. Luther ùdi ùcìitaba, ku diitabuuja, ne bikwàbò byà mùshindù awu. Kí n'Cyòci to.

¹⁶⁴ N'Dîyì! N'Dîyì diteemesha, Bukènkè buteemeshila pa byamù bilamakaja ne bilwè Bukolè bwendeshi. Bàdi Bukolè bwendeshi, pàdi Bukolè bwendeshi, pàdi Bukolè bwendeshi búlwa ku byamù bilamakaja. Bùdi bùbanga kunyùnguluja cintu aci. Ncyà bushùwà. Angàtà Dîyì. Kwòkò kwikàle cintu kampànda cipangike, ku Dyòdi adi, kacýàkuteema nànsha. Tèèkaayi ku luseke bujitu bwònsò, kasùmbù ne kasùmbù kwònsò, twìtabàayi yònsò, bwà Bukolè bwendeshi abu, Nyumà Mwîmpè, wàmòna mwà kupòngoloka mu Dîyì ne kushìndika Dîyì didì dilaya bwà ditùkù edi adi; pashìishe Èkèleeziyà munène wa Nzambi neàjuulè makàsà èndè panshì bu ndèkè mupeepula, ùbùuka mutàngile mu maulu bwà kutuutakeena ne Mukòòkeshi. Aci ncìmpè menemene. Twètù katùyi bènzè aci to, kabýàkwendakù to. Kí cidi bwalu ncyòci aci. Èyowà's, mukalenge. Wacyènza nganyi? Wacilama mu ditùkù ditùdi twètù twelanganapù meeji edi ki nganyi's? Wàvùlukà, wàvùlukà, mwanètù.

¹⁶⁵ Mpindyewu cidi cimvùlwija búnga bwalu bulonda's. Kí nkwalukila ku maalu-malonda to, kàdi mulundà wanyì kampànda ùvwa mwimàne mu Carlsbad, mu Nouveau Mexique, patùvwà kuntwaku munkaci mwà kwenza masangisha ku Carlsbad aku. Nènku kùvwa musùmbà wà bantu bàvwa bapwèkè mu nyòngòlò emu.

¹⁶⁶ Kaa, ncì—ncìtu kacya munangè cintu cyà mùshindù awu to, lwà mwinshì mu ndòndò amu, nènku mu ntàntà wa wìpacila ku kilòmèètà umwe ne mètres nkàmà yìsambòmbò mwinshì mwà buloba. Mémè, ndi musànkishiibwe kaaba aka. Pa nàнку, bààkapweka too ne ku ndekeelu. Mémè ndi muswè kuya mubànde muulu menemene, kí nkupweka mwinshì menemene to. Pa nàнку ndi . . .

¹⁶⁷ Kwangatabò muntu ewu, kupwekabò muntwamu. Nènku yêyè awu ùvwa mulunda wanyì wa balùme, ne mwanèndè wa bakàji mutekète ne mwanèndè wa balùme mutekète kupwekabò naabò mwinshì amu. Kí—kí kupwekabò e kubwela mu nzùbu munène wa mwinshì mwà buloba, kaa, mémè kudyèlela meeji, nkàmà ne nkàmà ne nkàmà yà makàsà mwinshì mwà mpàla wa buloba, kupweka mwinshì mwàmwa. Nènku muntu mulùme udi ku mbota kwàka awu, dyàkàmwè [Mwanètù Branham ùdi utuuta cishòndò—Muf.] kujimayè

mbòta awu. Kàdi e kushààlamù mufiike ne mîdimà yà fitùtùù, mu mùshindù wà kùyikù mwà kumòna nànsha cyanza cyèbè cìnyungakana mumpàlà mwèbè nànsha. Kànà kàà bakàjì katekète, kakwàcikwètù aku, kukwàcikakù bwòwà bwà dikèma. Kî kubangakù kwela mbilà mikolè díyi dyamba kukàpàta, “Kaa, kùdi mifitù! Kùdi mifitù! Kùdi mifitù,” yèyè kukùtùla mbilà.

¹⁶⁸ Mwakùnyèndè wa balùme kushààlayè mwimàne kuulu. Wàkeela lubilà lukolè mu mîdimà amu, kwambayè ne: “Kùcìinyi to, mwakùnyàànyì wa bakàjì, kùdi muntu kaaba aka udi mwà kuteemesha bukènkè.”

¹⁶⁹ Alèluuyàh! Èkèleeziyà mukesè ewu cyènzàye ncinyì? Kanùtácishi meeji to. Kùdi Muntu kaaba aka leelù ewu udi mwà kuteemesha Bukènkè, m’Mukalenge Yesù Kilistò. Kaa, èyowà’s. Mukalenge Yesù Kilistò!

¹⁷⁰ Vùlukàayi ne, bampofo...ba—bantu babanji mu matùkù à dilediibwa dyà Yesù, kabààkapàtùdiibwa pambèlu ne kufofomejiibwa ku bukènkè butòndòke bwà Yelusàlemà dîbà dyàkabwelàbomù, bàkonka bwà maalu àvwà àMutàngila to. Tèòlòjì wabò—tèòlòjì wabò awu kàvwakù mufwànyine kucyùmvwija to. Kàdi mbenzè ànu bàcinguluka ku luseke, bààkaCìlonda ku Bukènkè bwà Mwoyi wà Cyendèlèèlè.

¹⁷¹ Nwènú beena kantu-ku-byanza leelù ewu, kanwikadikù nutàngila makènkè matòndòke à mu malongolodi aa to, kàdi shààlaayi bakwàte ku Díyi. Didi dikùlombola ku Bukènkè. Kùcìinyi to, mwakùnyàànyì wa bakàjì, kùdi Muntu kaaba aka Udi mwà kuteemesha Makènkè. Kùdi Kilistò kaaba aka Udi mwà kuvwija Díyi Dyèndè ne mwoyi ànu menemene mùvwàYe musangu awu amu, ùDìshindika Yèyè mwinè ne Yèyè ùdi umweumwe awu makèèlèlè, leelù, too ne kashidi. Nudi nuciitabuuja anyì?

Tùjuukilàayi kuulu.

¹⁷² Ndi ne tusunsa dikumi ne tùtaanu kumpàlà kwà dîbà bwà kuya mu disangisha didì dilonda. Nudikù mwà kuswà bwà kwela byanza byènú muulu kwamba ne: “Nzambè, teemèshaaku bukènkè pambidi pàànyì, mu dindà emu. Mèzè ndi ngiitabuuja Díyi. Mémè ndi ngiitabuuja byamu bilamakaja. Tèèka Bukolè bwendeshi abu munda mwànyì, Mukalenge?” Elàayi byanza byènú muulu nùMwelè mbilà ne: “Mukalenge, tuteemèshileku Makènkè’s!” Kùdi Muntu mwaba ewu udi mwà kuteemesha Makènkè. Tudi bafwè, mu communisme, badìike butubutu kùdi mikùmbì yìdì yitùpika yà mîshindù yònsò yà malongolodi, kàdi kùdi Muntu kaaba aka Udi mwà kuteemesha Makènkè. Muntu awu n’Nyumà Mwimpè, Yèyè mwinè, Yesù Kilistò mumwènèshìibwe mu Nyumà!

¹⁷³ Mukalenge Yesù, lengàku cyònsò ne cyònsò cyà ku byanza ebi; kacyì ànu byanza nkàayabi to, kàdi pwekèshà dibòko mu

mwoyi, ne ùteemeshè Bukênkè bwà Èvànjeeliyò. Mu Dîna dya
Yesù! 🙏

64-0125 Teemèshà Bukênkè
Ramada Inn
Phoenix, Arizona États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org